



၁၃၂





12004

289
5.

1439 N. II - 2

ԵՂՕԹԱՄԱՏՈՅՑ

կամ

ԶԲՈՍԱՐԻ ՀՈՊԵԼՈՒ:

Աշուածական և առաջարկական Ա-
ման Հայոց ազգական ամենայն հայոց :



Դ ՄՈՍԿՈՎ:

1840.

1439 մ/

160-ԸԿ

ԵՂՕԹԵՄՎՏԱՅՑ:


Դանձարան՝ ուխտականութեան աղօթմատոյց և
զբոսարան Հոգևոր՝ ի ժամ անմահ դառինն՝ անա-
րիւն զենման, և ՚ի յառանձնութեան ջերմեռանդ
քրիստոնէից՝ կենսառիթ խոկմունք, և երանական
զմայլեցուցիչք:

Երտաղբեալ երանելի Հօրն մերոյ Աղեքսանդր
կաթուղիկոսի ՚ի պէտո լուսաւորչական անձանց:

՚Ի Հայրապետութե՛ Տեառն Յովհաննու Աստուա-
ծընսիր կաթուղիկոսի ամենայն Հայոց և Ասպետի:

Յառաջնորդութե՛ Որուստիաքնակ հայոց Տն Ներ-
սիսի Արժանընտիր Արհի եպիսկոպոսի և Ասպետի:

՚Ի շոյս ածեալ վեցութին, արդեամբ և ծանինեա ելից
եղբարսց, ՚ի Գէորգ և ՚ի Գրիգոր Աւագ սորիտ-
ագոց և ՚ի Մհըտճէ աէլ Յարութիւննեան Սո-
ւայտուեանց ։ Առան հոգւոյ ծնողոց, Եղբարսց և
պատահաց իւրինեանց ։



՚Ի ՄՊԱԿՈՎ:

՚Ի Տպագրութեան Շեմանի Տպարեանց:

1840.

ПЕЧАТАТЬ ПОЗВОЛЯЕТСЯ

съ тѣмъ, чтобы по отпечатаніи представлено было въ Ценсурный Комитетъ узаконенное число экземпляровъ
Москва, 1840 года, Апреля 29 дня.

Цензоръ В. Флеровъ.



՚Ի Ավետինէ Հոգելոյս հայլապէտէ յօրընեալ յա-
ռաջականութիւն Աղօթքրչոյս Յարում ստիւ-
թնէ և զուարիսութիւնէ աղօթից :

Ա ամիմ աստէն խօսիլ համառօտ բանիւք
*****զորպիսութենէ և զհարկաւորութենէ ա-
զօթից : Համառօտ ասեմ, վասն զի՞ նախապէս՝
գիրք տետրակիս այնպէս պահանջէր : Երկրորդա-
պէս՝ զի բոլոր աստուածաբանք որք անցեալ են՝
և որք գալոց են. եթէ՞ի մի եկեալ՝ կամիցին խօ-
սիլ վասն աղօթից, ոչ կարեն բոււականապէս ճա-
ռել զզօրութենէ նորա : Օ՞ի՞ ի բոլոր աստուա-
ծաշունչ գիրս, թէ՞ի հինն, և թէ՞ի նորս, որ-
քան հրաշք և մեծագործութիւնք լեալք են, ՚ի
ձեռն աղօթից տեսանին, որպէս յայտնի իսկ է :
Վ ասն որոյ մեք ըստ պահանջման փոքրու տետրա-
կիս՝ համառօտաբար ասասցուք զղիտմանէ մերմէ՝
և վերջացուսցուք : Եսդ՞ի հետիլն մարդոյս ՚ի
ոլատուիրանացն Ըստուծոյ, և ՚ի զրկիլն յամենա-
բարելի դրախտէն, և յանկանիլն յաշխարհս այս
աշխարելի, պատահեցաւ երից դլխաւոր պակա-
ռութեանց . այսինքն՝ նեղութեան աղքատութեան
և հիւանդութեան՝ ըստ հոգւոյն և ըստ մարմնոյն :

Իսկ Քրիստոս տէրն մեր՝ որ է ամենակարօղ փըր-
կիչ, ամենահարուստ թագաւոր, և ամենիմաստ
բժիշկ. Հնարեաց զղեղ երից պակասութեանցս այ-
սոցիկ : Քանզի՝ զնեղեալսն և զգերեալսն՝ ի սաստ-
նայէ՝ ազատեաց պատուական արեամբն իւրով. որ-
պէս ցուցանէր երևելապէս առ դիւահարսն : Օ աղ-
քատսն լցոյց բարութեամբ՝ ասելով՝ որ գայ առիս,
ոչ քաղցիցի. որպէս և երևելապէս եցոյց առ հինգ
հաղարսն : Եւ զհիւանդսն բժշկեաց պէսպէս հրա-
շիւք. որպէս յայտնապէս ցուցանէր առ ցաւագ-
նեալսն : Բատ աւետարանին թէ՝ զօրութիւն բա-
զում ելանէր ՚ի նմանէ և բժշկէր զամենեսեան :
Քանզի՝ զմարմնաւոր հիւանդսն բանիւ բժշկէր.
և զհոգեոր հիւանդսն՝ հոգեոր դեղօք. այսինքն՝
պահօք, ողորմութեամբ, խոնարհութեամբ, հալա-
ծանօք, խաչիւ՝ և այլ առաքինական գործովք :
Որպէս ասէր, նեղ և անձուկ է ծանապարհն՝ որ
բժշկէ զմեղաւորն և տանի ՚ի կեանս :

Ծայց մինչ զկոկծեցուցիչ դեղորայս զայսոսիկ՝ ՚ի
գործ ածէր, մարմնասէր և անարի մարդիկը տրտըն-
ջէին զնմանէ ասելով թէ՝ այդ դեղորայքդ դառն
են. եթէ այդպէս իցէ, ով կարէ ապրիլ :

Վասն որոյ՝ ուսոյց առ հասարակ ամենեցունց
դիւրին դեղ մի, որ յամենայնի պիտանի է, և
ամենայն ցաւոց առողջարար այսինքն՝ զաղօթս առ-
նել : Ասելով թէ՝ զոր ինչ և կամիցիք, ինդրե-
ցէք առնուցուք. և թէ յաղօթս կացէք չմտանել
՚ի փորձութիւն : Ահա քեզ դեղ մի հեշտագիւտ,
դիւրին, յամենայնի պիտանի, և միշտ առ ձեռն

պատրաստ . որում ոչ ինչ դոյ արգել . և ոչ ունի
դժուարութիւն մի :

Քանզի վասն պահոց կարես պատճառել թէ՝
տկար եմ . և այլն : Վասն ողորմութեան ասել
թէ՝ աղքատ եմ , զի՞նչ տաց : Վասն ծգանց , հա-
լածանաց , չորչանաց . վասն հաւատոյ . և այլոց
այսպիսեաց խստագունից առաքինական գործոց՝ կա-
րես ոլատճառս դնելթէ . դժուարինք են . ոչ կա-
րեմ տանիլ : Իսկ վասն աղօթից բնաւին չունիս
ինչ զպատճառս դնելոյ : Քանզի՝ յոր հասալի , յոր
կացութեան և յորում ժամանակի և յոր տեղոջ
և իցէ ոք , թէ ծեր՝ թէ տղայ , թէ հարուստ , թէ
աղքատ , թէ առողջ , թէ հիւանդ . կարէ աղօթել՝
եթէ կամիցի :

Ուրեմն տես՝ որքան նախատելի է ծոյլն՝ ի յա-
ղօթից . որ գոլով յամենայնի կարօտ և շրջապա-
տեցեալ՝ ի ոլէսպէս փորձութեանց յերեւելեաց և
յաներեւութից , ոչ դիմէ առ յայնպիսի տուօղն՝ որ
ինքն յորդորէ թէ խնդրեցէք և առնուցուք . և
թէ եկայք առիս ամենայն վաստակեալք և նեղեալք,
և ես հանգուցից զնեզ :

Առը ուրեմն ով եղքայր այնպիսի առատապար-
գե կոչողին , և մատիը առ նա . և խնդրեան զինչ
և կամիս : Եթէ հիւանդ ես , կաց յաղօթս . զի ե-
զեկիս աղօթիւք զերծաւ՝ ի հիւանդութենէ , և
յաւել զկեանս իւր , և առյօթեցաւ՝ ի ոստիսակոյ :
Եթէ՝ ի նեղութեան ես , աղօթեան . զի երեք ման-
կունքն աղօթիւք առլեցան՝ ի հրոյն : Եթէ մեղա-
ւոր ես , կաց յաղօթս . զի նինուկացիքն և մանա-

սէ, և այլք բազումք՝ աղօթիւք արդարացան և դարձուցին զբարկութիւնն Աստուծոյ՝ ի քաղցրութիւն։ Եւ թէ զպակասութիւն ինչ ունիս, խնդրեա աղօթիւք զի ինքն տուօղն ասէ, խնդրեցէք և առնուցուք։ զի որ խնդրէ, առնու։ Վանզի ըստ սրբոց վարդապետաց՝ որպէս կարօտի երկիրս երկնից, զի ընկալցի՝ ի նմանէ զցող, զանձրև, զջերմութիւն, զլոյս՝ և զայլ ազգմունս։ զի առանց նոցա ոչ կարէ մնալ՝ ի կայի։ Այսպէս և մարդս կարօտի աստուածոյին պէսպէս շնորհաց և օգնութեանցն։ որ առանց նոցա որպէս թէ՝ մեռեալ է ըստ հոգւոյն, թէպէտ և մարմնով կենդանի իցէ։ Ուրեմն՝ որպէս դիմեն աղքատքն առ մեծատունան։ հիւանդը առ բժիշկսն, փորձանաւորքն առ կարօղսն։ և ծարաւիքն առ աղքիւրն։ նոյնալիս և մարդս գոլով կարօտ յամենայնի և փորձանաւոր՝ ըստ հոգւոյն և ըստ մարմնոյն։ պարտի միշտ դիմել և դեգերիլ առ Աստուած աղօթիւք՝ և խնդրել՝ ի նմանէ զօդնութիւնս։

Արդ լուարուք։ զի տեսակք աղօթից՝ երկու են. այսինքն՝ հասարակական, և առանձնական։ Հասարակական աղօթքն՝ է որպէս վճարումն հասարակական պարտուց մերոց՝ զորս ամեներեան հասարակապէս պարտիմք Աստուծոյ։ Վասն զի՝ ստեղծ զմեզ յոչնչէ. արար զմեզ բանական։ վերստին փրկեաց զմեզ՝ ի գերութենէ սատանոյի։ և յարոց՝ ի մեռելութենէ մեղաց. պահպանէ զմեզ հանապազ. և լնու զպէտս հոգւոց և մարմնոց մերոց։ Այս ամենայն են իբր պարտք՝ ի վերայ մեր. և

վճարեմք որպէս թէ զայս պարտս՝ այն հասարակական աղօթիւքն, մինչ ամենեքեանս գնամք յեկեղեցին՝ ի կարգեալ ժամուն, և միաբանութեամք աղօթեմք։

Իսկ առանձնական աղօթքն այն է՝ որ բաց՝ ի հասարակական աղօթիցն, երբ՝ և ուր և իցէ, ըզմեզ ժողովեալ՝ առ Աստուած դիմեսցուք։

Ուրեմն գիտեա. զի հասարակական աղօթիւքն թէպէտ վճարեմք զպարտս մեր որպէս թէ, որպէս ասացաք. սակայն՝ այս ո՛չ է այնքան շնորհ և հաւատարմութիւն մեզ. զի զպարտս մեր լոկ վճարեցաք։ Որպէս թէ առնուցու ոք յումեմնէ զհինգ դեկան փոխ. և յետոյ վճարիցէ նմա զնոյն հինգ դեկանն. արդ՝ զի՞նչ շնորհ արար նա տուողին. զի զոր ինչ առեալ էր, զայն վճարեաց։ Այլ մեծ շնորհ և հաւատարմութիւն առողին այն է, որ ՚ի վճարել պարտուցն, զիր մի ինչ ևս աւելորդ եղեալ ՚ի վերայ ընծայիցէ տուողին. յայնժամ քաղցրանայ և տուողն՝ և ևս առաւելապէս տայ նմա ՚ի խնդրելն։

Այսպէս և մեք ՚ի վճարելն զպարտս մեր հասարակական աղօթիւքն, եթէ առանձնապէս ևս դիմիցեմք առ Աստուած, և յատուկ զաղօթս ինչ աւելի մատուցանիցեմք նմա, (որ է առանձնական աղօթքն). յայնժամ ասիմք հաւատարիմք. և կարեմք ասել ըստ քանքարաշահ ծառային թէ՝ տէր՝ հինգ քանքար ետուր ցիս. ահա զհինգ քանքար ևս ՚ի վերայ շահեցայ։ Յայնժամ և Աստուած քաղցրացեալ ՚ի մեզ, ասէ ծառայ հաւատարիմ,

պրովէետեւ՝ ի սակաւուդ հաւատարիմ եղեր, 'ի վերայ բազմաց կացուցից զքեզ. մուտ յուրախութիւն տեառն քոյ : Եւ թէ՝ որ ունիցի, տացի նմա և յաւելցի . այսինքն՝ զկնի անցաւոր կենացդ, և տաց քեզ և զյաւիտենական կեանսն :

Ա. ըդ՝ երկու տեսակ աղօթողաց վախճանն այս է զոր ասացաք :

Իսկ զի՞նչ ասասցուք և վասն այնոցիկ՝ որք ոչ ընդ հասարակին աղօթեն, և ոչ առանձին : Ո՞չ. զնոցանէ գանկատէ Աստուած՝ ի ձեռն դաւթի թէ՝ որ ուտէր զհաց իմ, արար ինձ խարէութիւն : Յիւրաւի՝ քրիստոնեայ մի՝ որ ՚ի տունն Աստուծոյ ոչ գնայ, զանունն Աստուծոյ ոչ յիշէ, և ոչ կարդայ առ նա . և բերանով ասէ թէ՝ ես քրիստոնեայեմ և զՔրիստոս Աստուած պաշտեմ, նա զԱստուած խարէ . զի զքարիսն Աստուծոյ վայելէ, մարմնոյ և սատանայի հետեւի և զնոսա պաշտէ :

Վնբան անասունն ծանաչէ զդարմանիչ տէրն իւր. գեգերի միշտ՝ ի տան նորա . և ոչ մեկնի ՚ի նմանէ : Իսկ՝ ծոյլն յաղօթից՝ գոլով մարդ բանական, ոչ ծանաչէ զԱստուած զքարերարն իւր . և ոչ զանուն նորա յիշէ . և ոչ ՚ի տուն նորա հայի որ է եկեղեցի : ՚ի նախատինս այնպիսեանցն ասէ Աստուած՝ ի ձեռն եսայեայ թէ՝ ծանեաւ եզն զըստացիչ իւր . և էշ զմոռւր տեառն իւրոյ . և իսրայէլ զիս ոչ ծանեաւ . և ժողովուրդ իմ զիս ՚ի միտ ոչ էառ :

Վտածեսցեն ուրեմն այնալիսի աղօթազուրկ անձինքն թէ՝ որպէս են կտլոց առաջի Քրիստոսի ՚ի

զատաստանի և զլի՞նչ տալոց են զպատասխանիս . և
կամ ո՞ր դժոխք կլանելոց է զնոսա : Անկարծիք ոյն
է պատահելոց նոցա՝ որ պատահեցաւ յիմար կու-
սանացն . որք մինչ բաղլսէին զգուռն՝ ասելով . տէր
տէր՝ բաց մեզ լսէին զպատասխանիս Քրիստոսի թէ՝
ոչ գիտեմ զձեզ . ’ի բաց կացէք յինէն՝ և թէ եր-
թայք յինէն անիծեալք՝ ’ի հուրն յաւիտենական :
Քանզի՝ մինչ ես կոչէի զձեզ ողորմութեամբ , ա-
սելով թէ՝ եկայք առիս . խնդրեցէք և առնուցուք
բաղլսեցէք և բացցի ձեզ . դուք ոչ լսէիք բնաւին
և ոչ գայիք առիս . և ոչ ճանաչէիք զիս : Այժմ
և ես ասեմ թէ՝ ոչ գիտեմ զձեզ : Յորմէ փրկեա-
ցէ զմեզ նոյն Քրիստոս Աստուածն մեր :

Արդ՝ սիրելիք իմ՝ թէպէտ անյարմար էր այս-
քան երկարաբանելն մեր , սակայն՝ հարկն պահան-
ջեաց՝ որ ’ի վերայ մեր կայր . սակս այնպիսեաց ռ-
մանց որք դոն յազդիս մերում . որք յիմարացեալք
քան զանասունս՝ զգուռն եկեղեցւոյ և զժամ ա-
զօթից ոչ ճանաչեն . ’ի յերեսս խաչակնքել ոչ
զիտեն . և զանունն Աստուծոյ յիշել և աղօթել
ոչ ունին : Եւ ոչ գիտեն թէ յինչ կոչին , և վախ-
ճանն իւրեանց ուր իցէ եղերելոց : Որք և ոչ մի-
այն ինքեանց սլատրաստեն զկորուստ , այլև զաւա-
կաց և ընտանեաց իւրեանց : Օք զի՞նչ գործէ հայրն,
և որդին նմին նման գործէ : Վասն այտրիկ այս-
քան երկարեցուցաք , զի զգուշացին այնպիսիքն՝ և
ես ազատիցիմ ’ի խղճմտանաց և ’ի պարտուց :

Եւ արդ՝ ասեմ սիրելեացդ իմոց . զի որովհետեւ
այսքան հարկաւոր՝ պիտանի՝ և օգտակար է աղօթ-

Քըն մարդոյս յամենայնի , և մանաւանդ՝ 'ի ներկոյումս ժամանակի , որպէս յայտ է ամենեցունց : Վասն որոյ՝ ես մեղաւորս և կարօտս աղօթից ձերոց՝ և անարժան տեսուչս օրհնեալ ազգիդ իմոյ ժողովեցի զայս համառօտ բանս աղօթից 'ի գրոց որբոց՝ և եղի 'ի փոքրիկ տետրակիս՝ և ընծայեցի հարազառ ազգիդ իմոյ որպէս զնորաբոլլոջ և անուշահոռ ծաղիկ մի և կամ որպէս զղեռահաս և նախախայծ պլոտղ մի՝ յառաջ եկեալ 'ի հոգեսոր և յաստուածատունի յայգւոյ ձերմէ . և կամ որպէս զնոր օրհնութիւն մի 'ի որբոյ Աթոռոյս Եղմիածնէ : Օոր և դուք պարտիք յատուկ սիրով և ուրախութիք ընդունիլ վասն երից պատճառաց : Նախ զի է սա անդրանիկ . ամլածին . և իբր՝ աւետեաց և սբանչելեօք զաւակ՝ հոգեսոր ծնողացս ձերոց՝ ըստ տպագրութեանն նորոյ՝ Քրիստոսիւ յաջողելոյ : Քանզի՝ 'ի լուսաւորչէն մերմէ մինչև ցայսօր չէր ծնեալ ձեզ՝ սյապէս զաւակ հոգեսոր ծնօղս ձեր . զի և արրահամ թէպէտ ունէր զբազում զաւակս յայլոց կանանց , սակայն միայն իսահակ սիրեցաւ՝ և մեծարեցաւ վասն յաբրահամու և 'ի սառայէ լինելոյն՝ յետ սյնբան ամլութեանն :

Երկրորդ՝ զի լի է յամենայնի հարկաւոր և օգտակար դիտմամբք . և մանաւանդ՝ պատշաճաւոր ըստ ժամանակիս . զի կապարն առաւել սիրի 'ի ժամ պատերազմին քան զոսկին :

Երրորդ՝ զի փոքրադիր է և հեշտակը լի , և մանաւանդ՝ պարզ և դիւրառք . որ յամենայն տեղոջ՝ և յամենայն ժամանակի՝ կարելի է առ ձեռն

գտանիլ և լցուցանել զքալցն ճաշակողաց ամենատեսակ համով որպէս մանանայն հնոյ ժողովրդեանն։ Որ և կարէ իսպ ոռ հատանել զպատճառածուլից, և ընդ վայր տրտնջողաց, որոց՝ սովորութիւն է ասել թէ՛ երկար է. դժուար է. և այլն։

Ուրեմն՝ առընկալարուք սիրով և բաղձալի յօժարութեամբ, և զբօսարուք հոգևորապէս ՚ի ամագոնէ՛ յօրն անգամ մի։

Եւ Քրիստոս Աստուածն մեր՝ տացէ ամենեցունց զզգաստութիւն. լուիցէ զաղօթս և կատարեսցէ զիսնդրուածս սիրով ընդունողացդ. և ինձ աշխատողիս ևս մասն հանցէ յաղօթից ձերոց. ողջ լերուք ՚ի աէր։





Ճշմարտասլէս մեռաւ մարմնով.
զի փրկեսցուք մեք Աստուծով:



Գառնիչ տրտու ու ի առ հանու լլ Ե բոցայաց ի չ նար հ ը դոց
Հառ է տրտու ացն Ա ն է ու լուս է ար գ ու ու լլ Ե ո ր մ ո ւ
պ ո ւ ն ի Պ ա տ ա ր տ ա թ ի ն հ ա յ է տ ղ ո ւ ն ե ա ց :

Ն շ ա ն ա կ ո ւ թ ի ղ գ ե ս տ ո ւ ց՝ ս ք ա տ ա ր ա զ ի ն :

~~~~~  
**Ք** ա հ ա ն ա յ ն՝ ն շ ա ն ա կ է զ տ է ր մ ե ր Յ ի ս ո ւ ս  
Բ ր ի ս տ ո ս . ո ր ե զ ե ւ ծ մ ա ր ի տ ք ա հ ա ն ա յ  
յ ա ւ ի ս ե ա ն ը ս տ կ ա ր գ ի ն մ ե լ ք ի ս ե ղ ե կ ի . և զ ի ն ք ն ՚ ի  
ն ե ր ք յ տ ե ա լ ա ց հ ա ց ի և գ ի ն ւ յ՝ հ օ ր Կ ս տ ո ւ ծ ո յ  
պ ա տ ա ր ա զ ե ա ց :

Ս ա ղ ա ւ ա ր տ ն ն շ ա ն ա կ է զ զ օ ր ո ւ թ ի ւ ն յ ա ղ թ ո ւ թ ի  
տ ե ա ո ն մ ե ր ո յ Յ ի ս ո ւ ս ի Բ ր ի ս տ ո ս ի , ո ր ո վ ե լ ՚ ի  
պ ա տ ե ր ա զ մ ը ն դ դ է մ բ ե լ ի ա ր ա յ . և ա ր ա ր զ ի ր կ ո ւ  
թ ի ւ ն ա զ գ ի մ ա ր դ կ ա ն :

**Ը** ա պ ի կ ն՝ ն շ ա ն ա կ է զ ա ն մ ե ղ ո ւ թ ի և զ մ ա ք ր ո ւ թ ի  
վ ա ր ո ւ ց տ ն մ ե ր ո յ Յ ի ս ո ւ ս ի Բ ր ի ս տ ո ս ի և զ մ ա յ լ ո ւ մ ն  
ն ո ր ի ն ե ր ա ն ա կ ա ն ա ւ տ ե ս ո ւ թ ի է ո ւ թ ե ն Կ ս տ ո ւ ծ ո յ :

**Գ** օ տ ի ն՝ ն շ ա ն ա կ է զ ո ղ ջ ա խ ո հ ո ւ թ ի ւ ն տ ե ա ո ն մ ե ր  
ո յ Յ ի ս ո ւ ս ի Բ ր ի ս տ ո ս ի , և զ ա ն խ ա ո ն ո ւ թ ի ւ ն ն ա  
ր ի ն ՚ ի զ զ ա յ ա կ ա ն ա ց ց ա ն կ ո ւ թ ե ա ն ց :

Բազմանն՝ նշանակէ զյօժարութիւն սրտի, և ըդպատրաստութի տեառն մերոյ Յիսուսի Քրիստոսի, առ ՚ի կատարել զհաճութիւն հօրն երկնաւորի:

Աւրարն՝ նշանակէ զհնազանդութիւն ան մերոյ Յիսուսի Քրիստոսի, առ ՚ի լնուլ զկենսագործ տնօրէնութիւնն իւր՝ ըստ նախասահմանութեան հօրն երկնաւորի:

Եռուջառն՝ նշանակէ զլրումն ամենից առարինութեանց՝ որով զարդարեցեալէր մարդկութիւն տեառն մերոյ Յիսուսի Քրիստոսի ՚ի յսկզբանէ յղացմանն իւրոյ:

Մտանելն քահանային՝ ի սրբազնատունն՝ նշանակէ զիջումն բանին Աստուծոյ ՚ի յարդանդ ամենօրհնեցելոյ կուսին մարիամու:

Օգեստաւորիլն քահանային՝ նշանակէ զներմարմնութիւն բանին Աստուծոյ ՚ի յարդանդի ամեներանուհոյ կուսին մարիամու:

Երգելն դպրաց զխորհուրդ խորին՝ նշանակէ զազօթս և զպազատանս, զոր նախահարքն մատուցանէին առ Աստուծած վասն դալստեան տեառն մերոյ Յիսուսի Քրիստոսի:

Ելանելն քահանային՝ ի սրբազնատանէն, նշանակէ զծնունդն և զյայտնութիւնն տեառն մերոյ Յիսուսի Քրիստոսի:

Գնալն քահանային առաջի բեմին, նշանակէ զգնասլն տեառն մերոյ Յիսուսի Քրիստոսի ընդ աշկերտաց իւրոց ՚ի լեառն ձիթենեաց:

Տէր իմ Յիսուս Քրիստոս՝ որ ՚ի մերձենալ ժա-

մու չարչարանաց քոց՝ վասն տաղնապաց ոգւոյդ  
սկսար երկնչիլ և հոգալ:

Ենորհեամեղաւորիս՝ զի զամենեսեան զհոգս և  
զորտմութիւնս իմ՝ վերանուիրիցեմ քեզ՝ ՚ի պա-  
տիւ սրբազնից քցոց չարչարանաց և արդեամբք  
նոցին ընդունիցեմ զփրկութիւն հոգւոյ իմոյ:

Ուանալն քահանային զձեռո՞նշանակէ զարտա-  
սուելն տեառն մերոյ Յիսուսի Քրիստոսի ՚ի լերինն  
ձիթենեաց:

Տէր իմ Յիսուս Քրիստոս՝ որ ՚ի յաղօթելն ք-  
աւհայր, փղձկմամբ սրո՞ի հեղեր զարտասուս յա-  
չաց քոց՝ ՚ի լուացումն մեղաց նախահօրն. շնոր-  
հեամեղաւորիս զճշմարիտ զզօւմն զի զտիւ և ըզ-  
գիշեր ողբակով զյանցանս իմ, և խոստովանելով  
զմեղս իմ՝ վերաբնդունիցեմ զներումն և զթողու-  
թիւն յամենառառ աղբերէդ կենաց:

Ասելն քահանային, խոստովանիմ առաջի Աս-  
տուծոյ՝ նշանակէ զանկանիլն տեառն մերոյ Յիսու-  
սի Քրիստոսի ՚ի վերայ երեաց իւրոց, և զհեղուլն  
յինքենէ զբըստունս արեան:

Տէր իմ Յիսուս Քրիստոս՝ որ ՚ի սաստկանալ  
երկանց քոց՝ զփոյլակս արեան հոսեցեր ՚ի մարմնց  
քումմէ. շնորհեամեղաւորիս՝ զի ՚ի պատիւ չար-  
չարանաց քոց, փոխանակ արեան՝ հեղից յաշաց  
իմոց զաղբիւրս արտասուաց:

Ելանելն քահանային ՚ի բեմն, նշանակէ զաղօ-  
թելն տեառն մերոյ Յիսուսի Քրիստոսի բազմիցս  
՚ի լերինն ձիթենեաց:

Տէր իմ Յիսուս Քրիստոս՝ որ յաղակս անանդու-

բռւթեան սրտի քո՝ չոգար կըկին և երեքկէն աղօթել առ հայր քո երկնաւոր. շնորհեան մեղաւորիս զյարառեւութիւն՝ ի դործս բարիս, զի արժանի լինիցիմ ընդունել՝ ի քէն զխնդրուածս իմ:

Ասելն քահանային՝ ի յարկի քում սրբութեան, նշանակէ զծնրադրութիւն տեառն մերոյ Յիսուսի Քրիստոսի՝ ի լերինն ձիթենեաց:

Տէր իմ Յիսուս Քրիստոս՝ որ ծունը կըկնելով առ հայր քո երկնաւոր՝ աղօթեցեր մարդկաբար՝ զի անցցէ՝ ի քէն բաժակ չարչարանացն. շնորհեան մեղաւորիս՝ զի յաւէտ ծունը կըկնելով երկրագանիցիմ կենսատուիդ իմում՝ հոգւով և ճշմարտութեամբ:

Համբուրելն քահանային զսեղանն, նշանակէ ըգմանիլն տեառն մերոյ Յիսուսի Քրիստոսի:

Տէր իմ Յիսուս Քրիստոս՝ որ համբուրիւնենդութեան, մատնեցար՝ ի յուղացէ. շնորհեան մեղաւորիս՝ զի անխարդախ սրտիւ, սլաշտիցեմ ըգքեզ զամենայն աւտ քո կենաց իմոց. և միշտ պատրաստ լինիցիմ առ՝ ի կատարել զպաշտօն սիրոյ՝ ի դէմս սիրելեաց և ատելեաց իմոց:

Երգելն դպրաց զմեղեղիս, նշանակէ զխօսիլն անմերոյ Յիսուսի Քրիստոսի քաղցրութք ընդ յուղի՝ ընդ ամբոխին՝ ի լերինն ձիթենեաց:

Տէր իմ Յիսուս Քրիստոս՝ որ վասն փրկութե իմոյ ընդ դաւաճանողաց թշնամեաց քոց, քաղցրութեամբ և հեղութեամբ անդորրաբար խօսեցար ընդ նոսա. շնորհեան մեղաւորիս՝ զի ըստ օրինակի կենսատուիդ իմում, ընդ ամենից հալածչաց իմոց և

առելեաց՝ համբերութեամբ և երկայնմտութեամբ  
վարիցիմ՝ ի փառս առուանդ քում սըբոյ:

Իջանելն քսհանային՝ ի բեմէն, նշանակէ զկա-  
պիլն և զածիլն տեառն մերոյ Յիսուսի Քրիստո-  
սի՝ ի լեռնէն ձիթենեաց՝ ի պալատն աննայի:

Տէր իմ Յիսուս Քրիստոս՝ որ՝ ի յանողորմից  
և՝ ի յամբարշտաց հրէից ըմբռնեցար՝ կապեցար՝  
և ածար իբրև զսլարտաւոր. շնորհեա մեղաւորիս,  
զի արդեամբ չարչարանաց քոյ՝ արձակիցիմ՝ ի  
կապանաց մեղաց իմոց. և կապակիցիմ սիրով  
ընդ քեզ հաստատասիս:

Երգելն դպրաց յայս յարկ նուիրանացն, նշա-  
նակէ զաղաղակ դպրաց և փարիսեցւոցն ընդ սպա-  
ւատոջն:

Տէր իմ Յիսուս Քրիստոս՝ որ հեզութեամբ և  
խոնարհութիւն համբերեցեր խրոխտանաց և սպառ-  
նալեաց դպրաց և փարիսեցւոցն՝ վասն փրկութեան  
իմոյ. շնորհեա մեղաւորիս, զի երկայնմտութեամբ՝  
ըմբերիցեմ ընդդէմ ամենից ունահարութեանց  
երեւլեաց և աներեւութից թշնամեաց իմոց:

Դառնալն քահանային՝ ի բեմն ընդ սարկաւա-  
գացն, նշանակէ զտանիլն տեառն մերոյ Յիսուսի  
Քրիստոսի՝ ի պալատն պիղատոսի:

Տէր իմ Յիսուս Քրիստոս՝ որ՝ ի քահանայիցն  
և՝ ի ծերոցն մատնեցար իբրև զմահարլար՝ ի ձեռն  
սիղատոսի. շնորհեա մեղաւորիս, զի զօրութեամբ  
շնորհաց քոյ աղատիցիմ՝ ի մատնեցմանէ՝ ի ձեռն  
իշխանին խաւարայնոյ՝ և արբանեկաց նորին:

Երգելն դպրացն զշարականն, նշանակէ զամբա-

1439-54

տանութիւն և զչարախօսութիւն ամբոխին ժողովեցելոյ:

Տէր իմ Յիսուս Քրիստոս՝ որ ամբաստանեցար՚ի հրեից վասն իմ իբրև զչարագործ։ Հնորհեա մեղաւորիս՝ զի շնորհօք և զօրութեամբ քոյոց անմեղութեան՝ ազատիցիմ ՚ի կեանս իմ ՚ի զրպարտութենէ մարդկան՝ և յորոգացթից սատանայի:

Երջաբերելն սարկաւագին՝ զսրբազան աւետարանն՝ նշանակէ զշրջաբերումն տեառն մերոյ Յիսուսի Քրիստոսի ՚ի տանէն սփիղառոսի առ տունն հերովդէի:

Տէր իմ Յիսուս Քրիստոս՝ որ վասն իմ ՚ի յանօրինաց արհամարհեցար և այսպանեցար։ Հնորհեա մեղաւորիս զի օգնութեամբ սրբազանից քոյոց չարչարանաց զերծանիցիմ ՚ի խայտառակեցմանէ սարսահելոյ հրապարակին:

Ինթեռնուլն զգիրս մարդարկականս և զառաքելականս, նշանակէ զհարցաքըննութիւն հերովդէի և սփիղառոսի:

Տէր իմ Յիսուս Քրիստոս՝ որ վասն իմ իբրև զսրաբառաւոր և մնասագործ կացեր ՚ի յատենի զատաւորացն՝ մեծաւ խոնարհութեամբ։ Հնորհեա մեղաւորիս. զի ՚ի միւսանգամ քո գալստեանն՝ զուարթերես մատչիցիմ առ դատաւորդ իմ երկնաւոր:

Ինթեռնուլն սարկաւագին զսրբազան աւետարանն՝ նշանակէ զպատասխանիս տեառն մերոյ Յիսուսի Քրիստոսի զոր ետ սփիղառոսի:

Տէր իմ Յիսուս Քրիստոս՝ որ կալով առաջի սփիղառոսի վկացեցեր ձշմարաւթեան. շնորհեա մե-

դաւորիս՝ զի հաւատով և սիրով քո ամբացեալ՝  
ոչ երկիցեմ՝ ՚ի յանօրինաց, և ՚ի յանհաւատից  
բռնաւորաց, ոյլ համարձակապէս խոստովանիցիմ  
զքեզ աստուածդ իմ ծշմարիտ՝ մարմնացեալ, չար-  
չարեցեալ. և խաչեցեալ վասն փրկութեան իմոյ:

Ասելն սարկաւագին զհաւատամբն, նշանակէ  
զուրացումն պետրոսի առաքելոյն:

Տէր իմ Յիսուս Քրիստոս՝ որ ըստ աստուածայ-  
նոյ քում տրամադրութեան՝ թոյլ ետուր պետրո-  
սի, զի զքեզ մարդկապէս ուրանայցէր, շնորհեա  
մեղաւորիս, զի զքեզ միշտ ընդ հօր և ընդ հոգ-  
ւոյդ սրբոյ մի Աստուած ծշմարիտ խոստովանիցիմ.  
և հաւատայցեմ և դաւանիցեմ:

Դառնալն քահանային առ ժողովութդն ասելով  
խաղաղութիւն. նշանակէ զդառնալն տեառն մերոյ  
Յիսուսի Քրիստոսի առ պետրոս:

Տէր իմ Յիսուս Քրիստոս՝ որ աստուածայնով  
քո գթութեամբդ՝ դարձար և ակնարկեցեր առ  
պետրոս՝ տալով նմա զղջումն և զյորդումն արտա-  
ռուաց. շնորհեա մեղաւորիս, զծշմարիտ զղջումն  
սրտի. զի զտիւ և զգիշեր ողբալով զսխալանս իմ.  
ընդունիցիմ զներումն և զթողութիւն ամենից մե-  
զաց իմոց:

Առնուլն սարկաւագին ՚ի գլխոյ քահանային ըզ-  
աղաւարտն՝ նշանակէ զմերկացուցանիլն սեառն  
մերոյ Յիսուսի Քրիստոսի ՚ի զինուորաց:

Տէր իմ Յիսուս Քրիստոս՝ որ վասն փրկութե  
իմոյ զգեստո նախատանաց զգեցար. գանից և ագ-  
տակաց հայրերեցեր. շնորհեա մեղաւորիս, զի ՚ի

ձեռն ապա շխարութեան մերկանայցեմ ինձէն բզ-  
գեստս պղծութեան . և զգենուցում զշնորհդ քո  
երկնային . և կապակցիցիմ ընդ քեզ, զի դու ես  
վերագնիչ իմ:

Երգելն դպրաց զսրբասացութիւնն , նշանակէ  
զկատակիլն տեառն մերոյ Յիսուսի Քրիստոսի ՚ի  
զինուորաց :

Տէր իմ Յիսուս Քրիստոս՝ որ վասն իմ փշով  
սպակեցար , և եղեգամբ հարկանեցար ՚ի հրեից .  
շնորհեա մեղաւորիս , զի զօրութեամբ սրբազանից  
քցոց չարչարանաց . զերծանիցիմ ՚ի փշոց մեղաց  
և մերկանայցեմ զամենայն հանդերձս չարութեան .  
և լինիցիմ քեզ ճշմարիտ երկրութու մինչ ՚ի  
վաղձան կենաց իմոց :

Երջաբերելն սարկաւագին զընծայսն՝ նշանակէ  
զածիլն տեառն մերոյ Յիսուսի Քրիստոսի ՚ի պի-  
ղատոսէ յարտաքս առ հրեայս :

Տէր իմ Յիսուս Քրիստոս՝ որ վասն կեցութե-  
իմոյ ածիս այսր և անդր՝ իբրև զգառն անմեղ , և  
իբրև զորոջ առաջի կտրչի անմառնչ կատ . շնոր-  
հեա մեղաւորիս՝ զի ամենից վշտաց և տառապա-  
նաց կենցաղոյս ՚ի փառս անուանդ քում սրբոյ՝ ա-  
ռանց ձանձրանալոյ համբերիցեմ :

Օ ողջոյն տալն միմեանց՝ նշանակէ զհաշտու-  
թիւնն պիղատոսի և հերովդի :

Տէր իմ Յիսուս Քրիստոս՝ որ քոյով սրբազա-  
նօք չարչարանօքդ՝ պառձառ եղեր հաշտութեան  
անիրաւաց դառաւորացն . շնորհեա մեղաւորիս ,  
զի ՚ի բաց լքեալ զամենայն խռովութիւնս և զո-

իսակալութիւնն՝ ընդդէմ ամենից հաւատացելոց  
եղարց իմոց, սիրով և խաղաղութեամբ կենցաղա-  
վարիցեմ:

Առանալն քահանային զձեռս, նշանակէ զլուա-  
նալն պիղատոսի զձեռս իւր՝ ի վկայութիւն անմե-  
ղութեան տեառն մերոց Յիսուսի Քրիստոսի:

Տէր իմ Յիսուս Քրիստոս՝ որ ՚ի յանիրաւ դա-  
տաւորէն պիղատոսէ լուացմամբ ձեռաց նորին՝ ան-  
մեղ անսպարտ գոլ վկայեցար. շնորհեած մեղաւո-  
րիս, զի զամենայն աւուրս կենաց իմոց ՚ի մէջ  
զանազանից փորձութեանց ալեաց ծովու աշխար-  
հիս՝ անմեղութեամբ կենցաղավարիցիմ՝ ի վառս քո-

Ասելն քահանային զերեքսրբեանն, նշանակէ  
զերիս սուտ վկայսն զոր վկայեցին անշարժարապէտ

Տէր իմ Յիսուս Քրիստոս՝ որ վասն կեցութե՛ հա-  
ւատացելոց քոց՝ զբարբառեցար ՚ի ստոց վկայից. շնոր-  
հեած մեղաւորիս, զի հանապազ զմիտու և զխոր-  
հուրդս առ քեզ ուղղիցեմ, և ընդ երկնային զօրան՝  
զերեքսրբեանն քեզ երգիցեմ. և զքեզ ճշմարիս  
ստեղծօղ՝ փրկիչ և վերագնիչ իմ գոլ ճանա-  
չիցեմ:

Ասելն քահանային Առեք կերեք, նշանակէ ըդ-  
բանն պիղատոսի որ ասաց հրէից, առէք զսա դուք՝  
և ըստ ձերոց օրինացն դատեցէք:

Տէր իմ Յիսուս Քրիստոս՝ որ մատնիտ ՚ի յանի-  
րաւ դատաւորէն՝ ՚ի ձեռս ամբարշտացն հրէից, զի  
վասն իմ չարչարիցիս և մահուխաչի համբերիցես.  
շնորհեած մեղաւորիս, զի զօրութեամբ սրբազնից  
քոյոց չարչարանաց, զերծանիցիմ՝ ՚ի յանիրաւաց

դատաւորաց, 'ի զբարարաւթենէ մարդկան և յուրոգոյթից սատանայի :

Առնուլն քահանային զընծայսն 'ի ձեռն՝ նշանակի զգանիլն և զձաղիլն տեառն մերոյ Յիսուսի Քրիստոսի 'ի պիղատոսէ և 'ի զինուորաց նորին :

Տէր իմ Յիսուս Քրիստոս՝ որ վասն փրկութենից գանեցար և ձաղեցար և ապօտելեցար. շնորհեաւ մեղաւորիս զի օգնութեամբ սրբազանից քոյց չարչարանաց զերծանիցիմ 'ի տանջանաց դժոխյանոց և 'ի սպառնալեաց գեհենոյն և 'ի կովահարութենէ խաւարայնոց :

Խաչակնքելն քահանային յաճախ 'ի վերաց սըրբազանի մարմնոյ և արեան՝ նշանակի զբեկուելն զինաւորաց 'ի վերաց սրբոյ խաչին :

Տէր իմ Յիսուս Քրիստոս՝ որ վասն փրկութենից տարածեցեր զբաղուկս քոյս արարչագործս և 'ի վերաց խաչախյուին բեկուեցար. շնորհեաւ մեղաւորիս, զի զթաղծեալ սիրաս իմ սիրով ընդքեղ բեկ բեկուիցեմ, և մի երբէք 'ի քէն մեկուսացեալ հեռանայցեմ:

Կալն սարկաւագացն ընդ աջմէ և ընդ ձախմէ. նշանակի զերկուս աւազակս խաչեցեալս յաջմէ և յահեկի տեառն մերոյ Յիսուսի Քրիստոսի :

Տէր իմ Յիսուս Քրիստոս՝ որ վասն փրկութենից ընդ անօրէնս համարեցար. և երջանիկ աւազակին զարքայութիւն քո խոստացար. շնորհեաւ մեղաւորիս, զի յելանելն հոգւոյս 'ի մարմնոյս. արժանի լինիցիմ լսել զձայն քոյ ասոուածային երանաւէտ :

Ասելն քահանային ընդ որս և մեզ այց արագցես, նշանակէ վերաճանաչումն աւազակին, և ասելն յիշեա զիս տէր յարքայութեան քում:

Տէր իմ Յիսուս Քրիստոս՝ որ բացեր զաքս մտաց աւազակին, զի զքեզ տէր և Կատուած իւր գոլ հաւատայր. շնորհեա մեղաւորիս. զբացումն աչաց սրոտի իմոյ զի զքեզ ընդ հօր և ընդ հոգւոյդ սրբոյ գոլ մի Կատուած հաւատայցեմ. և յարքայութեա քում սրբոյ արժանի գոլ գտանիցիմ. և ընդ եկեղեցւոյն խրախուսելով՝ քեզ փառս և երկրպագութիւնս վերաւաքիցեմ:

Երգելն դպրաց՝ զհայրն մեր, նշանակէ զեօթն բանս, զոր արտաքերեաց տէր մեր Յիսուս Քրիստոս՝ ի վերայ խաչին:

Տէր իմ Յիսուս Քրիստոս՝ որ ՚ի վերայ խաչին վասն փրկութեան իմոյ ծարաւեցար. և խաչանուաց քոյ աղօթեցեր. շնորհեա մեղաւորիս. զի սրբազանիւ քոյով նալաստութեամբ՝ դառնայցեմ ՚ի յախտից մեղաց իմոց. և ներելով իմոց պարտապանաց՝ քեզ ծշմարիտ հովուիդ իմում հետեւիցիմ:

Իարձրացուցանելն քահանային զընծայսն՝ նշանակէ զաւանդումն սրբազանի հոգւոյն տեառն մերոյ Յիսուսի Քրիստոսի ՚ի վերայ խաչին:

Տէր իմ Յիսուս Քրիստոս՝ որ զհոգի քո ամենամաքուր՝ ՚ի վերայ խաչին ՚ի ձեռն հօր Կատուծոյ աւանդեցեր. շնորհեա մեղաւորիս, զի օգնութեամբ կենսատուիդ իմոյ՝ զհոգի և զմարմին իմ,

հօր քում երկնաւորի՝ յանուն քո յանձն առնիւցեմ և տեառնադրիցեմ։

Թանալն քահանային զորատուական մարմինն ՚ի յանապական արիւնն, նշանակէ զներկիլն մարմնոյ տեառն մերոյ Յիսուսի Քրիստոսի արեամբ։

Տէր իմ Յիսուս Քրիստոս՝ որ ըստ նախադուշակութեանն ետայեաց մարդարէին՝ հնձան հարե՛ և զհանդերձ մարմնոյ քո ներկեալ արեամբ քով թաթաւեցեր. շնորհեած մեղաւորիս. զի ճաշակմամբ նոցին՝ մաքրիցիմ ՚ի բնաւից աշտեղութեց հոգեկանաց. և իսկութեամբ սիրոյ ընդ քեզ՝ մինչև ցկէտ կոչման իմոյ կապակցիցիմ հաստատապէս։

Դառնալն քահանային առ ժողովուրդն ունելով զբնծայսն ՚ի ձեռին, նշանակէ զհանգչիլն տնմերոյ Յիսուսի Քրիստոսի ՚ի գիրկս մօր իւրոյ՝ յետիջանելոյն ՚ի խաչէն։

Տէր իմ Յիսուս Քրիստոս՝ որ յիշանելն քո ՚ի խաչէն՝ հանգեար ՚ի գիրկս մարիստու անարատի մօր քո. և ցողով արտասուաց նորին կուսականաց՝ սոսդանիլ հանեցար. շնորհեած մեղաւորիս, զի ըլսիրտ իմ մեղսամած՝ քեզ կենսատուիդ իմում օթեան և առադաստ պատրաստիցեմ. և անդադար զխոցուածս մարմնոյդ՝ ողբալով համբուրիցեմ։

Արկանելն քահանային զմի մասն կենարար մալմնոյն ՚ի բաժակն, նշանակէ զիջումն հոգւոյ տեառն մերոյ Յիսուսի Քրիստոսի ՚ի գժոխս առ նախահարս։

Տէր իմ Յիսուս Քրիստոս՝ որ ըստ ողորմութեքում անձառելոյ՝ իջեր ՚ի դժոխս, միաւորեալ աստուածութեամբդ առ ՚ի սփոփել՝ և լերածել.

զնախահարս . շնորհեա մեղաւորիս , զի ՚ի մէջ  
դժոխոց մեղաց իմոց՝ արժանի լինիցիմ քում այ-  
ցելութեանդ , և օգնութեամբ քով՝ յառնիցեմ ՚ի  
մեռելոտի գործոց իմոց ամեն :

Դաշակելն քահանային զարբազան մարմին և  
արիւն տեառն՝ նշանակէ զթաղումն տեառն մերոյ  
Յիսուսի Քրիստոսի երեքօրեայ ՚ի գերեզմանի :

Տէր իմ Յիսուս Քրիստոս՝ որ վասն ազատելց  
զիս ՚ի գրոյ մեղաց , թաղեցար ՚ի գերեզմանի . շնոր-  
հեա մեղաւորիս՝ զի թաղելով զամենայն իղձա և  
զաղոս հոգւոյ իմոց ՚ի ձեռն զզջման և ապաշխա-  
րութեան վերանորիգիցիմ ՚ի փառս անուանդ քո-  
սըրոյ :

Երգելն դոկրաց զտաղս . նշանակէ զխնդութիւն  
և զհրձուումն աշակերտաց տեառն մերոյ Յիսու-  
սի Քրիստոսի :

Տէր իմ Յիսուս Քրիստոս՝ որ քոյով փառաւոր  
յարութեամբ՝ զհաւատացեալս քոյս բերկրեցու-  
ցեր . շնորհեա մեղաւորիս՝ զի ՚ի յարութեան  
յաւուրն յետնում . արժանի լինիցիմ բերկրիլ  
և ուրախանալ ընդ սլարս երջանկաց՝ և երանե-  
լեաց յարքայութեան քում . ամեն :

Դառնալն քահանային առ ժողովուրդն ասելով՝  
կեցն տէր զժողովուրդս քո , նշանակէ զերևիլն  
տեառն մերոյ Յիսուսի Քրիստոսի յետ յարութե-  
իրոյ :

Տէր իմ Յիսուս Քրիստոս՝ որ յետ յարութե-  
քո հրաշալոյ՝ երևեցար անարատի մօր քո և կու-  
սի . և առաքելոյն թօմայի , և այլոց քոց հաւա-

տարմաց սիրելեաց . շնորհեան մեղաւորիս , զի ըդքեզ ճշմարտապէս չարչարեցեալ խաչեցեալ և մեռեալ մարմնով հաւատայցեմ . և նովին մարմն նովն՝ յարուցեալ 'ի մեռելոց խոստովանիցիմ և դաւանիցիմ :

**Ասելն** քահանային՝ օրհնեալք եղերուք . նշանակէ զօրհնութիւն տեառն մերոյ Յիսուսի Քրիստոսի զոր եւ հաւատայցելոց իւրոց 'ի համբառնալն 'ի յերկինս :

**Տէր իմ Յիսուս Քրիստոս՝** որ 'ի համբառնալն քո 'ի յերկինս , օրհնեցեր զհաւատայցեալս քոյս խոստանալով նոցա զիմսիթարիչ սուրբ հոգին . շնորհեան մեղաւորիս , զի 'ի բնաւս խորհուրդս , 'ի բանս և 'ի գործս իմ , օրհնութեան քո մաստուածայնոյ և շնորհաց հոգւոյդ սրբոյ արժանաւոլ իցիմ **Ամէն:**





Դարձեալ՝ յաւելուած ՚ի նոյն տեսութիւն աղօ-  
թից, ընդարձակ բանիւ շարոսյարեալ :

Յայս յաբէ նուելիքանացնե՝ Տափո՛ պահօվնա :

Խ ոստովանիմ և հաւատամ ամենակատուր,  
ինքնակատար և նախակատար, զհամագոյ  
և զողաշուելի, երկը զագելի գերագոյ զամենասուրը  
զերորդութիւնն զայցը. և զՈրդի և զսուրբ հո-  
գին : Հայր անծին և անսկիզբն՝ ծնօղ Որդւոյ և  
յառաջ առաքօղ զոգւցն սրբոյ : Խակ որդին ծնեալ  
՚ի հօրէ նախ քան զյաւիտեանս անմարմնաբար և  
անժամանակապէս : Եւ զոգին սուրբ բղիսեալ ՚ի  
հօրէ անհատաբար և անսպառապէս, համազոյա-  
կից հօր և փառակից որդւոյ . միութեամբն բաժա-  
նեալ յերիս յանձինս, և երրորդութեամբն միա-  
ցեալ ՚ի մի բնութիւն և ՚ի մի աստուածութիւն :  
Եւ արդ՝ աղաչեմք զքեզ հայր երկնաւոր . միջ-  
նորդութեամբ միաձնի որդւոյ քո, և գթութեամբ  
հոգւցդ սրբոյ : Տօւր մեզ տէր հոգի զգաստութե՛,  
հոգի խորհոյ, հոգի հեղութեան, հոգի զօրութե՛.

Հոգի խմառութեան, հոգի գիտութեան, հոգի երկիւղի և աստուածալա շտութեան. և լից ամենայն բարեգործութեամբ. որպէս զի զկամս քո արարեալ յայսմ աշխարհի, եղիցուք արժանի ողորմութեան քում՝ ի հանդերձելումն շնորհօքն Քրիստոսի. ընդորոյ քեզ և հոգւոյդ սրբոյ վայելէ փառք պատիւ և երկրագործիւն յակիտեանս յաւիտենից ամէն:

Յուժում սէսանին զմանշուն շուրջուննի բարու  
պաշօննու:

Իւղ թափեալ անուն՝ միածին Որդի Աստուծոյ՝  
Աստուած ծմբարիո, որ յանձառական փառաց խոս-  
նարհեցար ՚ի հայրական ծոցոյ, և առեր զմարմին  
՚ի սուրբ և յանշաղախ կուսէն մարիամոյ, եղեր  
մարդ ծշմարտապէս՝ անփոփոխելիո ՚ի յէռ թեան,  
անցանելով ընդ ամենայն կիրս մարդկային՝ բաց ՚ի  
մեղաց, ՚ի յերկրի երևեցար և ընդ մարդկան շըր-  
ջեցար, և կատարեցեր զամենայն ըստ օրինացն,  
լրումն լինելով մարդարէից և օրինաց. զանիմա-  
նալի և զանհասանելի անուշահոտութիւն աստուա-  
ծութեանդ բուրեցեր յաշխարհի՝ հալորդելով զա-  
մենեսեան երկնաւոր և առաստաբաշխ պարգևիդ,  
՚ի յոր կցորդիլն զմայլեալ անմահացան տիեզելք:  
Եւ արդ՝ դունոյն ինքն բարերար և բազումորմ,  
բաց զքիմս մտաց իմոց հոտոտիլ ՚ի հոտոյ անու-  
շից մարմնոյ աստուածութեան քո, և ընկալ զա-

զօթս՝ մեր իբրև զխունկ անոյշ և որպէս զպառա-  
րագն արելի նոյի և արքահամու, և իբրև դբանա-  
ւոր պատարագս սրբոց քոց և սիրողաց անուան  
քո՝ որը՝ ի սկզբանէ հաճոյ եղեն քեզ, որոց մասին  
և մեզ լիցի ժառանդութիւն շնորհօք միածնիդ,  
այժմ և միշտ և յաւիտեանս յաւիտենից ամէն :

**Չ**այդ լիդ Ա թ թ ք լ ի դ ա ն ա լ ո ւ թ ա ն ա լ :

Սուրբ Աստուած անմահ և հզօր՝ որ որբարա-  
նեալ պաշտիս՝ ի հրեղէն և յանմարմին զուարթ-  
նոցն, անլուելի և անդադար օրհնաբանութեամբ.  
զոր և սերովեէքն սոսկալի և ահեղագոչ ձայնիւ  
երգեն զերգս երեքսրբեան՝ բարեբանելով զան-  
մահ տէրութիւնդ, և քերովեէքն գովասանական  
ձայնիւ փառաւորեն զանբաւելի Աստուածութիդ,  
և ամենայն զօրութիւնքն վերնական գոհաբանեն  
երկրապագութեամբ փառաւորելով զամենազօր թա-  
գուորութիւնդ : Ինդ որս և մեք բանաւոր հօտ  
քո, և ստեղծուածք անարատ ձեռաց քոց՝ ժողո-  
վեալ՝ ի գահիթ սուրբ եկեղեցւոյ քո կալով առա-  
ջի աստուածընկալ սուրբ սեղանոյս՝ տկար ան-  
ձամբ և մեղաւոր շրջամբք երգեմք զերգս երեք-  
սրբեան սրբասացութեամբ, և աղաչեմք զառա-  
տարաշլս գթութիւնդ, ընկալ զդուող շրջանց և  
զբանաւոր պատարագս սրտից մերոց՝ ի հաճոյս քեզ  
ըստ վերնոցն արժանաւորութեան, և թող մեզ

զամենայն յանցանս մեր, զկամայ և զակամայ, ըդ-  
դիտութեան և զանդիտութեան, զմտաց և զխոր-  
հըրդոց, զբանից և զգործոց, զհոգւոց և զմարմնոց,  
և զամենայն մասանց անդամոց, որալէս զի լիցի մեզ  
կարողութիւն արժանառիչս օրհնել զքեզ և գովիել  
զանուն քո սուրբ: Տուր մեզ Տէր մարքութիւն  
մտաց. զգջումն սրտից, ձշմարտութիւն շրթանց,  
զարտասուս աչաց, ամբծութիւն հոգւոց, և սրբու-  
թիւն մարմնոց: Եցո զմեզ ամենայն առաքինու-  
թեամբ, ալայծառ հաւատով, աներկբայ յուսով և  
մաքուր սիրով: Եւ զարդարեա զմեզ խոհեմութք՝  
ողջախոհութեամբ, արիութեամբ՝ և արդարութք:  
Զօրացո զմեզ յազթօղ Լինիլ ընդդէմ հնարից  
բանսարկուին, և զամենայն նետո մսւխս չարին  
շիջուցանել. արդարութեամբ և աստուածարաշ-  
տութեամբ կալ մնալ յաշխարհի ըստ հաճոյից և  
ըստ կամաց քոց, և յետ աստի կենացս զանձառ  
բարիսն վայելել տերամբ մերով. որում վառք և  
զօրութիւն յաւիտեանս. ամէն:

**Ա**պահուած մի նշյալ ունինդրութիւն է գրաց և  
սուրբ աւետարանին. և հուշափոմքն տուոց է ո  
չայդ ընդ էր գորդին:

**Ա**պահուած Սուրբ աւետարանին:

Տէր մեր Յիսուս Քրիստոս, որդի Աստուծոյ և  
բան հոր, որ ըստ անձառ բարերարութեան քո,

Ք կամեցար անտես առնել զարարածս ձեռաց քոյ,  
 այլ մարդասիրապէս գթացար յազգս մարդկան խռ  
 նարհեցար 'ի հայրական ծոցոյ էնդ Աստուած, ա-  
 ռեր զմարմին 'ի սուրբ կուսէն մարիամայ, կամաւ  
 չօր և հաճութեամբ սուրբ Հոգուոյն, զամենայն  
 զմարդիայինս յանձն առեր կրել բաց 'ի մեղաց.  
 և զաստուածային մարմինդ քո ետուր փրկանս փո-  
 խանակ բազմաց, ըստ կանխասացութեան անշուշտ  
 հրամանի քո խաչի և մահու համբերելով: Հո-  
 վիւդ քաջ զանձն քո եղեր 'ի վերայ բանաւոր հօ-  
 տի քո, ժողովել զցրուեալսն 'ի փարախ կաթու-  
 ղիկէ սուրբ եկեղեցի քո, լինիլ մի հօտ և մի հա-  
 վիւ: Վասն որոյ մեք ժողովուրդք և խաշն արօ-  
 տի քո՝ երկրամած դիմօք խոնարհեալ և 'ի ծունկու-  
 անկեալ աղաչեմբ զանքաւ մարդասիրութիւն քո,  
 մի թողուր զմեզ 'ի ձեռաց քոյ, և մի անտես առ-  
 ներ զանքիծ արեամբ քո փրկեալ հօտս. մի տար  
 զմեզ 'ի փորձ թշնամւոյն և հակառակորդին մե-  
 րոյ. սրբեա զմեզ 'ի մեղաց և մաքրեա զմեզ յա-  
 մենացն անօրէնութեանց մերոյ. լուա զսիրսոս մեք  
 'ի խղճէ չարեաց և փրկեա զմեզ անիրաւութեց.  
 լոյս տուր տէր աչաց մերոյ, զի մի երբէք ննջես-  
 ցուք 'ի մահ, մի լիցի առջի պարծանաց թշնա-  
 մւոյն, այլ խորառակեալ ջաղիսեացի դլուխ նորին՝  
 զօրութեամբ ամենայաղթ խաչի քո, և ակարաս-  
 ցին զօրութիւնք մեքենացից նորա: Եւ տուր մեզ  
 անարդել և անբռնադատ վճարել զկեանս մեք ա-  
 մենացն արդարութեամբ հետևելով լուսոյ շաւլաց  
 և երկնաչու ճանապարհին, 'ի վայրի դալարւոջ

բնակեցո՞ զմերզ և առ ջուրս հանգստեան սնո՞ . զի  
տեսցէ թշնամին և ամաչեսցէ զի քոյ եմք ստեղ-  
ծեալք և քոյ եմք փրկեալք , դու ես օդնական և  
փրկիչ մեր , զի բաց 'ի քէն զայլ ոք ո՛չ դիտեմք  
և զանուն քո տէր կարդամք զօրհանապաղ . մի թո-  
ղուր զժառանգութիւն քո 'ի ձեռաց քոց , այլ ա-  
մենազօր աջ քո՝ լիցի հովանի և պահապան 'ի վե-  
րայ պաշտօնէից քոց , բարեխօսութեամբ սուրբ  
աստուածածնին և ամենայն սրբոց քոց երկնաւո-  
րաց և երկրաւորաց , և քեզ փառք յաւիտեանս  
ամեն :

### Հ Ա Ր Ա Վ Ա Ր Ա Վ Ա Ր Ա Վ Ա Ր Ա Վ Ա Ր Ա Վ Ա Ր Ա Վ

Միջնորդ Վասուծոյ և մարդկան՝ Տէր մեր Յի-  
սուս Քրիստոս , որ ամենաբարի և խաղաղաբար  
միջնորդութեամբ քո հաշոտցուցեր զհայր ընդ  
արարածս , և արարեր խաղաղութիւն երկնաւորաց  
և երկրաւորաց , հեռաւորաց և մերձաւորաց . և  
զնոյն խաղաղութիւն շնորհեցեր եկեղեցւոյ քո ա-  
սելով , զխաղաղութիւն թողում ձեզ , զխաղաղու-  
թիւն զիմ տամ ձեզ : Եւ այժմ տէր աղաչեմք  
զքեզ՝ զերկնաւոր և զհաշոտար խաղաղութիւն  
քո պարզևեա մեզ , զի խաղաղութեամբ և հան-  
դարտութեամբ վարեսցուք զկեանս մեր , առանց  
մեղաց և առանց գայթակղութեան . և սուրբ սրբ-  
տիւ սիրել զմիմեանս որպէս դու զմեզ սիրեցեր ,

և դնել զանձն ՚ի վերաց ընկերին որպէս դու ե-  
գեր , և լինել առ միմեանս դթածք՝ քաղցունք և  
բարերարք , որպէս դու արարեր , հնազանդութք  
և խոնարհութք ծառայել միմեանց , որպէս դու  
խոնարհեցար ՚ի ծունկս քոյոց աշակերտացն . որով  
մարթացուք լինիլ ալատշաճապէս անդամք և  
մարմին գլխոյդ մերոյ : Եւ դու Տէր ասացէր , թէ  
ուր երկու և երեք ժողովեալ են յանուն իմ՝ անդ  
եմ ես ՚ի մէջ նոցա : Վ ասն որոյ և մեք ժողո-  
վեալ յանուն քո ՚ի գաւիթ սուրբ կաթուղիկէ ա-  
ռաքելական եկեղեցւոյ , և աստուածային և սուրբ  
ողջունիւս եղեալ մի անձն և մի սիրտ , բստ սրբոց  
առաքելոցն : Լ ուր աղաքանաց մերոց մարդասէր  
տէր և բնակեան ՚ի սիրտ և յոդի ժողովելոցս յա-  
նուն քո : Արբեալ մաքրեան յարդարեան զմեզ լի-  
նիլ տաճար և բնակարան ամենազօր շնորհաց քոց .  
Հեռացո՞ ՚ի մէնջ զամենայն խորամանկութիւն և  
զնենգութի թշնամոյն , զի սուրբ սրտիւ և մաքուր  
մտօք , երկիւղիւ և արդարութեամբ զօրհանապազ  
փառաւորեսցուք զամենազօր անուն քո , այժմ և  
միշտ և յաւիտեանս յաւիտենից ամեն :

**Յ ա յ ժ ա մ ս հ ա յ ո ւ թ ի ս ո ւ լ ի ն է լ գ է ն ։ Ա ռ և կ ա յ հ օ մ ա ն ա ։**

Առուրբ սուրբ սուրբ տէր զօրութեանց . Լի են  
երկինք և երկիր փառօք քո , սերոբէքն աղապա-  
կեն հըաշալի և հոգեղին բարբառով առաջի փա-

ոաց աթոռոյ աստուածութեան քո. քանզի զար-  
 հուրեալ հիասքանչ և 'ի հրաշալի փառաց քոց  
 ոչ ունելով կարողութիւն արժանապէս փառաւո-  
 րել զանհասանելի մեծութիւն քո: Վ ասն որոյ  
 անլոելի և անդադար օրհնաբանութեամբ փառա-  
 ւորեն զմիասնական աստուածութիւնդ, զպաշտելի  
 և զհամագոյ երրորդութիւնդ: Ա, ըդ՝ եթէ հրեղէն-  
 քըն չեն բաւական քոց անբաւութեան, մեք հո-  
 ղանիւթեայք և յերկիր կործանեալքս՝ զխարդ կա-  
 րասցուք բովանդակել բանիւ զանբաւելի գթու-  
 թիւնդ առ արարածս, և մանաւանդ առ ազգս  
 մարդկան: Որ նախ սկզբանն արարչագործ ձե-  
 ռամբդ ստեղծեր զնախնին մեր զաղամ, պատուե-  
 լով զնա քան զայլ արարածս՝ որ բանիւ միայն  
 արարան. և յետ սկասուիրանազանցութեն պըտ-  
 զյն ծաշակման, ոչ արարեր անտես զանկեալ  
 բնութիւնս, այլ ետուր զօրէնս, և առաքեցեր ըզ-  
 մարգարէս յայտնելով զօդուտն. իսկ պատրեալքն  
 'ի պատրողէն ոչ ծանեան զխորհուրդ բարերար  
 կամաց քոց: Ապա հայրդ երկնաւոր կամելով յայտ  
 առնել զանծառական սէրդ, կամակցութք հոգ-  
 ւոյն սրբոյ, առաքեցեր զմիածին և զծոցակին բա-  
 նըդ, որ եկեալ մարմնացաւ 'ի սուրբ կուսէն և  
 նովին մարմնովն համբերեաց չարչարանաց, խաչի  
 և մահու, և եղե քաւութի մեղաց մերոց: Վ ասն  
 որոյ մեք ընդ սերովբէիցն երգեմք նմա ասելով,  
 սուրբ՝ սուրբ՝ սուրբ տէր զօրութեանց, լի են եր-  
 կինք և երկիր փառօք քո, օրհնութիւն 'ի բար-  
 ձունս. օրհնեալ է դալուստ քո յաշխարհս 'ի

փրկութիւն մեզ Քրիստոս Աստուած մեր . օրհնեալ է կենսաբեր տնօրէնութիւն քո . օրհնեալ է փրկաւէտ չարչարանք քո , որով զերծաք 'ի չարչարանաց և յանչարչարութիւնն վիճակեցաք : Օրհնեալ է կենդանարար մահն քո , որով փըրկեցաք 'ի դառն մահուանէ , և յանմահութիւնն երկնից վերափոխեցաք . որ յաւէժական գոհաբանութեամբ մատուսցուք փառք և երկրագագութիւն բարերարիդ՝ փրկչիդ և որոգովիդ , յաւիտեանս յաւիտենից . ամէն :

---

**Յ**արքամ Առելք կերպեն աստիպէն՝ Տապա՛ :

Օրհնեալ է պարզեառուն կենաց , և պարզեն անմահութեան Քրիստոս Աստուած մեր :

**Ե**ւ յարքամ Արբելք 'ի սմանէ առեն՝ Տապա՛ :

Օրհնեալ է շնորհն ձրի , և պարզեն անձախելի , կենդանի և կենդանարար մարմին և արիւն Քրիստոսի Աստուծոյ մերոյ :

---

**Յ**արքամ հայր երիտասարդն աստիպէն՝ պայտ առջուն Տապա՛ :

**Հ**այր երկնաւոր բարերար և բազում ողորմ Աստուած , տուօղ բարեաց և պարզեիչ կենդանու-

թեան, ամենաբարի բնութեամբ՝ յաղթեալ եղեց  
 'ի մարդասիրութենէ, մինչ զի զհամագոյակից և  
 զարարչակից՝ աթուակից և հաւասարակից բանդ՝  
 առաքեցեր յաշխարհ, առ ՚ի մարմնանալ ՚ի սուրբ  
 կուսէն, և նովին անմեղ և անպարտական մարմ-  
 նովն՝ եղեւ գին և փրկանք ամենայն աշխարհի. զի  
 ետուր զնա՞ի զենումն, ՚ի մահ, և ՚ի փրկութիւն,  
 վասն ամենայն հաւատացելոց անուան քո մեծի:  
**Եւ այժմ աղաչեմք զքեզ, միջնորդութիւն մարմ-**  
 նոյ և արեան միաձնի քո: Հայեաց ՚ի հեղումն  
 սուրբ արեան նորա, և յանշնչութիւն նորա ՚ի  
 խաչին, ՚ի բացումն փրկական աղբերաց նորա, և  
 արեամբ թաթաւումն սուրբ մարմնոյ նորա, և ան-  
 ց՛ ՚ի մշնջ զցառումն պատուհասի յանցանաց մե-  
 րոց բարերարութեամբդ քով, զի նորա եմք փըր-  
 կեալ, խնայեա ՚ի գինս սուրբ արեան միաձնի քո,  
 և ողորմեա բանաւոր հօտի քոյ յուսացելոցս յա-  
 նուն քո:

**Յ ո բ ժ ո մ յ ա մ բ ն ա յ ն ի օ լ հ ն ե ո ւ լ ե ս պ է ր ն ա ս է ն , հ ա պ ա կ պ ա յ օ լ ն ա ս**

**Ա ր ժ ա ն ա պ է ս օ լ հ ն ե մ բ զ ք ե զ , և ա ր դ ա ր ա պ է ս զ ո վ ե մ բ և զ ո հ ա ն ա մ բ զ ք ե զ ն ա հ է լ ը լ ս տ ո ւ ա ծ մ բ ը , ո ր**  
 լստ բազում ողորմութեան քում՝ անտես արա-  
 բեր անարժան զործս մեր, և այսմ շնորհի արժա-  
 նաւորս կացուցեր, վասն միջնորդութեան մարմնոյ

և արեան միածնի քո, հաղորդս լիցուք փառաց  
աստուածութեանդ քո, միաւորելով ընդ գերապա-  
տիւ ծոխութեանդ քո։ Վասն որոյ՝ յամենայնի  
օրհնեմք, և ըստ ամենայնի գոհանամք զքէն զօր-  
հանապազ, տէր Աստուած մեր ողորմեա մեզ։

---

Յորժոյ ողորմ տափուծոյն տուեն, Տափո՛ պաշօն։

Հաց կենաց և բաժակ անմահութեան միածին  
որդի Աստուծոյ՝ տէր մեր և փրկիչ Յիսուս Քրիս-  
տոս՝ Աստուած Ճշմարիտ, մանանայդ երկնային խ-  
ջեալ՝ ի վերուստ, եղեր կերակուր ամենայն հա-  
ւատացելոց քոց. հեղմամբ արեան քոյ՝ ողորմեա  
բանաւոր հօտի քո, շնորհելով զթողութիւն յան-  
ցանաց մեղուցելոցս,՝ ի մահու՝ լե՛ր փրկութիւն  
հաւատացելոց, և արժանապէս ճաշակողաց զմար-  
մին և զարիւն քո սուրբ։ Յիշեա զփրկաւէտ չար-  
չարանսն քո և զկենսատու մահն, զարեամբ ճա-  
պաղումն ՚ի խաչին և զանտանելի կիրսն, զոր ըն-  
կալար ՚ի մարմինդ վասն մեր։ Եահաց ՚ի խոցուա-  
ծըս՝ արարչազործ ձեռաց և ոտից քոց, և ՚ի բա-  
ցումն կենարար վտակին որով նորոգեցան տիե-  
զերք, և արբեցան արարածք։ Եովին վտակօքն լուա  
և մաքրեա զմեզ յամենայն մեղաց մերոց. և թող  
մեզ զամենայն յանցանս մեր։ Խնայեա արեամբ  
քո փրկեալ հօտի, և այց արա մեզ ՚ի միւսան-  
զամ դալսատեան արբայութեան քում, զի մահու-

ամբ և չարչարանօք փրկեցեր զմեղ Քրիստոս Աստուած մեր՝ բարերար և նորոգօղ, և քեղ փառք և երկրալաղութիւն յաւիտեանս յաւիտենից. ամէն:

---

Յուժոյ հոգի ոյ տուեն, Տուփո՛ պառօն պայս:

Հոգի Աստուծոյ Աստուած ճշմարիտ, որ նախ յսկզբանն ըրջիր՝ ի վերաց ջուրց, և ստեղծանէիր զարարածս յոչնչէ, և պէսպէս հրաշոն դործեցեր յաւուրս մարգարէիցն, և ՚ի ժամանակի տնօրինութեան էակցին քո՛ իջեր՝ ի յորդանան և ՚ի վերնատունն, լցեր զառաքեալսն բազմապատիկ շնորհօք: Եւ այժմ աղաչեմք զքեղ միջնօրդութեամբ սուրբ մարմնոյ և արեան փառակցին քո՛ որ բազմեալ կոց՝ ի վերաց սրբոյ սեղանցոյ, Էջ՝ ի սիրո և յոգիս մեր, և մաքրեա զմեղ իբրև զառաքեալսն՝ ի սուրբ վերնատանն, և բորբոքեա ՚ի մեղ զկայծ սիրոյ աստուածութեղ, զի արժանապէս լիցուք տաձար և բնակարան քեղ և էակից փառակցացդ. և ամենազօր շնորհիւ քո՛ լիցուք փրկեալք յաւուր նորոգման մերոյ, և քեղ նորոգողիդ Աստուծոյ՝ վայելէ փառք յաւիտեանս ամէն:

---

՚ի ժոյ տուփոչէլոսն՝ Տուփո՛ պառօն պայս:

Յիշեա տէր և ողորմեա, և օրհնեա զուխտ և զժառանդութիւն եկեղեցւոյ քում սրբոյ, և շնոր-

Հեա մեզ զԵրկնային քո զխաղաղութիւն, զի մի լիցի ՚ի մեզ տեղի և մուտ չարին. հեռացո՞ի մէնջ զամենայն խարդախութիւն թշնամւոյն, և զբոնութիւն նորա խորտակեա, բարեխօսութեամբ և յիշատակաւ սրբուհւոյ աստուածածնին, և յովհաննու կարապետին, և սրբոյն գրիգորի մեր լուսաւորչին, և սրբոց առաքելոց և մարդարէից, և սրբոց հայրապետաց և մարտիրոսաց, ճգնաւորաց և կուսանաց, և ամենայն սրբոց քոց՝ երկնաւորաց և երկրաւորաց, որոց յիշատակն ևս օրհնութեամբ եղիցի ՚ի մէջ սուրբ եկեղեցւոյս՝ և առաջի սուրբ պատարագիս. ամէն :

---

**Զ այդ ընդ Գոհութեան՝ առա՛ զայծածուն պայ:**

Յիշեա տէր և ողորմեա, և դթա ՚ի հոգիս հանգուցեալ ծառայից քոց, որք ուղիղ դաւանութիւն պաշտեցին զքեղ, և նովին հաւատով և յուսով ննջեցին ՚ի քեզ. յիշեա զնոսա յաւուր մեծի գալքստեան արքայութեան քո, արա արժանի ողորմութեան, քաւութեան և թողութեան մեղաց, դասաւորեալ պայծառացո ընդ սուրբս քո յաջակողմեան դասուն, զի յաւէժական խնդութեամբ և մշտնջենական ցնծութեամբ փառաւորեսցեն զքեղ Քրիստոս, ընդ հօր, և ընդ սրբոյ հոգւոյդ, այժմ և միշտ և յաւիտեանս յաւիտենից ամէն :

---

Անդ հայոց մէլին՝ նոյն հայոց մէլ որ յէլ էլին տոտ' .  
ուն առըստնոն էան է :

---

Սրբոյն ոսկէ լուսնի ։ Եւ սրբութեան սրբոցն տոտ' :

Օքրեեալդ ինձ ՚ի փրկութիւն խոստովանիմ  
Ճշմարտապէս մարմին և արիւն Քրիստոսի Վատու-  
ծոյ՝ յուսոյ իմոյ, և աղաղակեմ առ քեզ՝ մեղայ  
յերկինս և առաջի քո, սրբեա զիս յամենայն ոլրղ-  
ծութենէ հոգւոյ և մարմնոյ, շնորհեա ինձ ժա-  
մանակ և ցանկութիւն ապաշխարութեան. փրկեա  
զիս յերեելի և յաներեւոյթ թշնամեաց. տալաւորեա  
զօգուտն հոգւոյս և մարմնոյս : Պարգևեա ինձ  
բարեգործութեամբ և բարեպաշտութեամբ՝ զքեզ  
արժանապէս ճաշակել, և փառաւորել զհայր, և  
զորդի, և զսուրբ հոգիոդ, այժմ և միշտ և յաւի-  
տեանս յաւիտենից ամեն :

---

Եւ յուժամ տառացն ՚ի սը ՚ի սըն, Տապու :

Խոստովանիմ և հաւատամ, զի դա է Ճշմարիտ  
մարմին և արիւն Յիսուսի Քրիստոսի որդւոյն Վա-  
տուծոյ, որ բառնայ զմեղս աշխարհի, ոչ մերոցս  
միայն, այլև ամենայն աշխարհի. հաւատովս հա-  
ւատամ, խոստովանիմ և երկիրագանեմ :

Երես անգամ պայս տոտ : Եւ ոյլ պէս պէս իլլն-  
ուլլութեան, կան ինունիւոյ և նուջեցնոց :

---

Յոհանն զբարեսարութեալն տուն, Տապա  
պատօն :

Միածին որդի Վատուծոյ և բան հօր՝ արարիչ  
երկնաւորաց և երկրաւորաց, և լցուցիչ համայն  
արարածոց, որ լնուս զամենայն յամենայնի, ան-  
պարագրելի գոլով բնութեամբ՝ բովանդակեցար՝ ի  
մարմնի, զի տեսանելի և շօշափելի լիցիս մարդ-  
կային ազգի, վասն որոյ՝ Ճաշակելի և կերակուր ե-  
ղեր ամենայն հաւատացելոց, զի տացես կեանսն  
յաւիտենականս այնոցիկ՝ որք հաւատով և սրբու-  
թեամբ մեծենան՝ ի քեզ, ըստ անսուտ խոստման  
քո մարդասէր : Եւ այժմ մեք փրկեալքս պատուա-  
կան արեամբ քո՝ հաւատով տեսանեմք զփրկիչդ  
մեր բոլորապէս պարունակեալ՝ ի ներքոյ կըկին  
տեսակաց՝ հացին և զինւոյն, հոգւով՝ մարմնով և  
աստուածութեամբ . յաղագս որոյ՝ երկրագրութիւն  
մատուցանեմք փրկողիդ մերոյ, և աղաչեմք զան-  
բաւ գթութիւն քո : Լոյժ զկապ մեղաց մերոց,  
և ջնջեա զձեռագիր մերոյ անօրէնութեան, բևե-  
ռեա զմեզ յերկիւղ և ՚ի սէր քո սուրբ, զի միշտ  
դնասցուք արժանի կոչմանն՝ յոր կոչեցեր զմեզ :  
Տուր մեզ տէր՝ բանաւոր հօտի քո, յամենայն  
սրտէ հետևել միայն զկնի ճշմարիտ հովուիդ և  
կատարել զկամն քո, և լսել զերանաւէտ բարբառ  
քո, և աճել օրբստորէ, պահել զսպատուիրանս  
քո զօրհանապաղ : Պարզեեա մեզ զսիրոս սուրբ  
և զհոգի խոնարհ, զի մի արհամարհեալ լիցուք  
առաջի քո . մաքրեա զմիտս և զիտրհուրդս մեր,

որպէս սըբոյ քոյ առաքելոցն, զի ընդ նոսին արժանի լիցուք՝ զոռւրբ և զսրբարար, կենդանի և կենդանարար, զմարմին և զարիւն քո՝ Քրիստոս Աստուած մեր, Ճաշակել և հաղորդիլ, յուսով կենացն յաւիտենից, ընդ ամենայն սուրբս քո, այժմ և միշտ և յաւիտեանս յաւիտենից. ամէն :

**Յ**արժայ ելի իւղիւ և հաւասարութ տուն, տուն' :

Աստուած մեր, և տէր մեր, երեսեցաւ մեզ,  
օրհնեալ՝ եկեալ անուամբ տեառն :

**Զ**ինի տուն' :

Գոհանամբ զքէն հայր ամենակալ, որդիս միածին, և հոգիտ ճշմարիտ, որ ընտրեցեր հաւատացեալքս անուանդ քում սըբոյ, ՚ի մասն վիճակի սըբոցն ՚ի լոյս, և բատացար քեզ ժողովուրդ սեփական, և արարեր հաղորդ փառաց աստուածութեանդ, և ժառանգորդ անձառ բարութեց քոյ. ոչ ըստ մերում արժանաւորութեան, ոյլ ըստ անբաւ գթութեան քո, որ միշտ շնորհես առատապէս և ոչ նախատես, փոքր պահանջես, և մեծամեծս պարգևես : Այս օրհնելով օրհնեմբ, և գոհանալով գոհանամբ զքէն տէր Աստուած մեր, որ յայսմ մասին զմեզ արժանաւորս կացուցեր : Աշղաչեմբ զքեզ մի թողուր զմեզ ՚ի ձեռաց քոյ՝ յայսմ հետէ մինչեւ յաւիտեան, և եկեսցէ ողոր-

մութիւն .քո 'ի վերայ մեր՝ զամենայն աւուրս կե-  
նաց մերոց . և եղիցի անուն .քո օրհնեալ յաւի-  
տեան և յաւիտեանս յաւիտենից ամէն :

'ի ՀԷՐԾԻ պայս աշօթո հափո' և գնա' իսոդապութե:

Ակիզբն և կատարումն ամենայնի Կատուած , որ  
ամենայն բարի 'ի քէն սկսանի և քև կատարի , և  
'ի քեզ բովանդակի ամենայն , 'ի վախճան աղօ-  
թիցս՝ ողորմեա մեզ , և լեր ընդ մեզ զամենայն  
աւուրս կենաց մերոց , և եղիցի ամենազօր աջ քո՝  
պահապան մեզ յամենայն ժամ 'ի տուէ և 'ի գի-  
շերի , 'ի նստիլ 'ի տան , 'ի գնալ 'ի ծանապարհ ,  
'ի ննջել և 'ի յառնել , և զամենայն դործս մեր՝  
'ի բարին կատարեա ամէն :





Աղօմք առ առւլն էրսրբութելենն ո՞յ մ՞ բարիա-  
նայցէ աղօմուկն զառն մեղաց + այշ ներելով պացէ  
պհաժարձակութելեն ՚ե յաղօմելն :

՚ի սէստնիշտ, նաշահնչեամ' պէհմտ երիցո անգամ :

**Օ**րհնեալ ես Հայր Սուրբ Կատուած Ճըշ-  
մարիտ : Օրհնեալ ես Որդիդ Սուրբ Կա-  
տուած Ճըշմարիտ : Օրհնեալ ես Հոգիդ Սուրբ  
Կատուած Ճըշմարիտ : Օրհնեալ ես Վմենասուրբ  
Երրորդութիւն և մի Կատուածութիւն : Վրարիչ  
և նախախնամօղ ամենայն արարածոց երևելեաց և  
աներևութից՝ քաւիչ և ներօղ ամենայն մեղաւո-  
րաց՝ փրկիչ և կեցուցիչ ամենայն նեղելոց և վտան-  
գաւորաց՝ որբ կարդան առ քեզ : Յոր և ես ամե-  
նաթշուառ ծառայս քո՝ հաւատամ, խոստովանիմ  
և երկիրականեմ : Յորմէ և յուսամ յընդունիլ  
զթողութիւն մեղաց իմոց . և զփրկութիւն հոգւոյ  
և մարմնոյ իմոյ :

Եւ աղդ՝ անկեալ առաջի ամենասուրբ երրոր-  
դութեանդ և միոյ աստուածութեանդ, աղաչեմ

զքեղ մեծաւ հառաջմամբ անոխակալ տէր իմ  
տուր ինձ համարձակութիւն, մատչիլ առ աղբիւրդ  
կենաց. և գտանել 'ի քէն զողորմութիւն: Մի  
բարկանար ինձ վասն բազում մեղաց իմոց, և մի  
յիշեր զանթիւ չարիսն իմ որ առ քեղ. մի մտա-  
ներ 'ի դառաստան ընդ ամենամեղ ծառայիս. որ  
ահա ես ինձէն գիտելով զյամենայնի յանցաւոր  
գոլն իմ, գիտելով և զանյիշաքարութիւն աստու-  
ծոյդ իմոյ՝ դիմեմ առ քեղ: Ուրեմն՝ հայեաց ողոր-  
մութեամբ 'ի ծառայս քո, և ասա քաղցրութք,  
զի՞նչ կամիս զի արարից քեղ:

Իսկ եթէ արդարութեամբ 'ի դատ մտեալ քննել  
կամիցիս մի ըստ միոջէ զանօրէնութիւնս իմ, ես  
որպէս կարեմ կեալ առաջի քոյ, և կամ որպէս  
կարեմ արդարացուցանել զիս :

Քանզի՝ դու ստեղծօղդ իմ զիտես զամենասխալ  
բնութիւնս իմ, և վկայեցեր իսկ ամենաճշմարիտ  
բերանովդ թէ չար է արարք մարդոյ, և ընդարդոյս  
է չարութիւնն. և թէ՝ միտք մարդոյ հաստատեալ  
են 'ի խնամս չարին: Եւ ես գիտեմ, և վկայեմ  
ճշմարտութեանդ. զի անօրէնութեամբ յղացայ, և  
'ի մեղս ծնաւ զիս մայր իմ. ըստ բանի դաւթի ծա-  
ռային քո:

Արդ՝ անօրէնութեամբ յղացեալն 'ի բնէ անտի՝  
և 'ի մեղս ծնեալն, որպէս կարէ արդարանալ ա-  
ռաջի քոյ. և որպէս կարէ կեալ՝ եթէ դու ողոր-  
մութեամբ քով ոչ օգնեսցես: Որպէս և դաւիթ  
ասէր, եթէ ոչ տեառն օգնեալ էր ինձ, բնակեալ  
էր անձն իմ 'ի դժոխս: Եւ յորժամ սխալէի և

անկանիլ կամէի , ողորմութիւն նորա օգնէր ինձ :  
 Ահա այս ողորմութիւնդ է՝ որ տայ մեղաւորաց  
 յոյս , և համարձակեցուցանէ մատչիլ առ քեզ :  
 Այս ողորմութիւն է՝ որ բանայ զլեզուս համրա-  
 ցելոց մեղօք՝ 'ի կարդալ առ քեզ և գտանել 'ի  
 քէն զհնար փրկութեան : Այս ողորմութիւն է՝ որ  
 դարձուցանէ զբարկութիւն քո 'ի քաղցրութիւն :  
 Արդ՝ տէր իմ արդար և ողորմած , և ես անօրի-  
 նեալ ծառայս քո՝ յայս յողորմութիւնս քո ապա-  
 ւինեալ՝ մատչիմ առ քեզ . և այսու ողորմութի-  
 իբրու վահանաւ ամրախիկեմ զիս յահէ 'արդա-  
 րութեանդ . և իբր փախստական անկանիմ առաջի  
 աթուոյ ողորմածիդ Աստուծոյ . և խնդըեմ , զի մի  
 արդարութեանդ մատնեսցես զիս , այլ ողորմութենդ  
 յանձն արարեալ պառսպարեսցես զիս . և մի ըստ  
 արդարութեանդ դարձուցանիցես զերեսս քո յի-  
 նէն , այլ ըստ ողորմութեանդ՝ 'ի մեղաց իմոց դար-  
 ձուսցես զերեսս քո 'ի յո՛չ տեսանել զնոսա . և ա-  
 սասցես յորդորական և զմալիր բարբառով թէ՝  
 զի՞նչ կամիս զի արարից քեզ : Եւ ես խոնարհե-  
 ցուցեալ զգլուխս իմ , ասեմ թէ՝ լուիցես զաղա-  
 շանս ծառայիս քո . և քաղցրութեամբ կատարեա-  
 ցես զիսնդրուածս իմ որ ահա մատուցանեմ քեզ :  
 Օի և ես ողորմելիս ողորմեալ՝ 'ի յորդորմած Աս-  
 տուծոյդ իմնէ փառաւորեցից զհայր և զՈրդի և  
 զսուրբ Հոգիդ . այժմ և միշտ և յաւիտեանս յա-  
 ւիտենից . ամէն :

---

Աղօթէս յապուշէ՝ վասն անչին աղօթողի:

Եւ արդ՝ ես յետնեալս և անարգագոյնս . ամենաթշուառս և յամենայնի յանցաւորս . միշտ սխալականս և ամօթալիս՝ որ չեմ իսկ արժանի հայիլ յերկինս և տեսանել զլոյս զգալի արեգականն . կամիմ . համարձակիլ և ներկայանալ առաջի ամենատես աչաց ստեղծողիդ իմոյ Աստուծոյ , որ ես ամենագետ և ծածկատես , և զանգործս մարդկան տեսանես :

Հայց՝ զայս գիտեմ և հաւատամ՝ զի դու ես երկայնամիտ Աստուած՝ ողորմած և ներօղ . և ոչ կամիս զմահ մեղաւորին , այլ զդարձ և զկեալն : Վասն որոյ՝ փղձկեալ սրտիւ՝ կորագլուխ անձամբ՝ և արտասուաթոր աչօք անկեալ յերկիր , բաղիսեմ ըզդուռն ամենառատ ողորմութեանդ քոյ՝ կալնլով զեղջերաց դորին . և վստահանամ յանսուտ հրամանս քոյ թէ՝ խնդրեցէք և առնուցուք . հայցեցէք և գտջիք . բաղիսեցէք և բացցի ձեզ : Ահա՝ խնդրեմ հառաչանօք՝ բաղիսեմ կողկողալով . և հայցեմ՝ ի քէն մարդասէր Աստուած , լուր զաղաշանս ծառայիս քոյ՝ զոր վերառաքեմ առ քեզ նախապէս՝ վասն իմոյ թշուառական անձինս : Վայինձ , վայ ինձ , և վայ իմոյ անօրինեալ անձինս . զի ոչ գիտեմ թէ՝ որ երեսօք համարձակեցաց առ քեզ՝ ով Աստուած իմ՝ զոր միշտ բարկացուցեալ եմ մեղօք , և արդէն՝ ի նոյն բարկութեանդ ներքոյ կամ : Օյինչ ասացից . և կամ որպէս խնդրեցից՝ ի քէն զթողութիւն մեղաց իմոց , որ ահա՝ ևս

կամ՝ ՚ի նոյն մեղս ընկղմեալ։ Վանզի գիտեմ հաւաստեաւ, որ արժանի եմ այնմ սարսափելոյ ձայնիդ թէ յորժամ համբառնայցես առիս զձեռն քո, ես դարձուցից զերեսս իմ՝ ՚ի քէն. և թէ յածախիցես յաղօթս, ոչ լուսց. պիղծք են ինձ նուէրք քո. յագեալ եմ քեւ. վասն զի՝ ձեռք քո լիք են արեամբ։

Յիրաւի՝ վասն իմապիսեաց անօրինելոց ասացեր զայս ՚ի ձեռն եսայեայ. և ես խոստովանիմ տէր՝ զի արժանի եմ՝ ոչ միայն զի դարձուցես յինէն զերեսս քո, և ոչ լուիցես ինձ, այլև՝ թէ՝ ՚ի դժոխըս իջուցանիցես կենդանւոյն, արժանի եմ։ Վանզ զի՝ ես ինձէն գիտեմ, զի մեղաւոր եմ յամենայնի և արժանի դատապարտութեան։

Վանզի՝ ոչ միայն ձեռք իմ են լի արեամբ, այսինքն՝ յափշտակութեամբ և զրկողութեամբ, և այլովքն որք ՚ի ձեռս վերաբերին. այլ՝ բոլոր անձամբս լի եմ անօրութեամբ և ամենայն մեղօք։ Ուստի՝ ոչ է բժշկութիւն մարմնոյ իմոյ. և ոչ գոյխաղաղութիւն ոսկերաց իմոց. և յոտից մինչեւ ցըգլուխս չիք առողջութիւն։ Վասն զի անօրէնութիւնը իմ բարձրացան քան զգլուխ իմ, և որպէս զբեռն ծանր՝ ծանրացան ՚ի վերսց իմ. որք ահա՝ հանդերձեալ են ՚ի դժոխս և ՚ի հուրն յաւիտենական ընկղմել զիս՝ եթէ դու ոչ օդնիցես ինձ։

Գիտեմ, գիտեմ, ով Աստուած իմ. զի դու ամենասուրբ ես՝ և զմեղս առես՝ և ՚ի մեղաւորաց գարշիս. վասն այսորիկ զաղօթս նոցա ոչ լսես.

այլ՝ դարձուցանես զերեսս քո՝ որպէս և ասես :  
 Որպէս և երանելին դաւիթ ասէր . թէ տեսանէի  
 'ի սրտի իմում զմեղս , մի թէ լուիցէ՞ր ինձ տէր :  
 Այլ զմեղս ատեցի և անարգեցի . և զօրէնս տն  
 սիրեցի : Ա ասն այսորիկ լուաւ ինձ տէր . և հայե-  
 ցաւ 'ի ձայն խնդրուածաց իմոց : Աակայն՝ ով անո-  
 խակալ Աստուած . ներօղ և գթած՝ երկայնամիտ  
 և անյիշաչար : Գիտեմ և զայս . և 'ի սուրբ գրոց  
 քոց լուեալ եմ , որ 'ի բարկութեանդ , և զողոր-  
 մութիւն յիշես . և 'ի կեանս յայս՝ զողորմութիդ  
 ածես 'ի գործ յաճախապէս . որպէս յայտնի է առ  
 նինուէացիսն . առ իսրայէլ . և առ յայլս բազումս :  
 Եւ նոյն սուրբ գրեանքն քո 'ի յիշելն զքեզ , բազ-  
 միցս՝ ողորմած և գթած անուամբ փառաւորեն ըզ-  
 քեզ . որպէս և դաւիթ ասէ . դու տէր՝ գթած ես  
 և ողորմած՝ երկայնամիտ և բազումողորմ առ ա-  
 մենեսեան՝ որբ կարդան առ քեզ :

Ապաքէն՝ յայտնի է ով Աստուած իմ՝ զի ըստ  
 այնմ որ արդար ես , բարկանաս մեղաւորաց . և  
 ըստ այնմ որ ողորմած ես , ոչ իսկոյն մասնես 'ի  
 կորուստ , այլ երկայնամտելով ներես , և դարձին  
 սպասես : Որպէս վկայէ դաւիթ՝ ոչ իսպառ բարկա-  
 նայ մեզ տէր . և ոչ յաւիտեան պահէ ոխս : Եւ  
 դու իսկ ասացեր օրհնեալ բերանովդ թէ՝ մի՝ թէ  
 կամելով կամիմ զմահ մեղաւորին . ոչ : Այլ ըզ-  
 դարձ և զկեալն : Եւ թէ՝ մեղաւորն յորում պա-  
 հու յոզոց հանիցէ , կեցցէ :

Ահա՝ յոյս աներկբայելի . տեղի ապաստանի՝ և  
 յարկ ապաւինի ամենայն մեղաւորաց : Օրհնեալ

է .քո ողորմութիւնդ . դովեալ է . քո դթութիւնդ . և բարեբանեալ . քո մարդասիրութիւնդ ո՞լ Աստուած մեր : Վասն զի՝ 'ի բարկութեանդ՝ զողորմութիւն՝ 'ի գործ ածես . 'ի դատելդ՝ զհնարս զերծման ցուցանես . 'ի պատժելդ՝ զճանապարհ ազատութեան ուսուցանես :

Եթէ այսպէս , ապա զի՞նչ փոյթ երկարապէս ձառել այժմ զորքանութենէ մեղաց իմոց . և կամ բանալ առաջի քյ մի ըստ միոջէ՝ որ զանդործս մարդկան տեսանես . և 'ի դիրս քյ զամենեանեան գրեալ ունիս : Եւ մանաւանդ՝ ես մեղաւորս ինքնին ահա՝ խոստովանեցայ զմեղաւոր գոլս իմ ամենայնիւ . որոյ աղագաւ 'ի ներքյ բարկութեան քյ կամ և եմ աղարտական դատապարտութե :

Այժմ՝ ո՞լ ողորմած Աստուած իմ . զգործս ձեռացդ , զպատկերս արարչիդ՝ և զգնեցեալս վերստին արեամբդ՝ թողնւս իսպառ . 'ի կորնչիլ : Քաւլիցի ողորմած աստուծոյդ իմոյ , որ զամենեցունց զկեալն կամիս :

Ուրեմն՝ աղաչեմ զքեզ մարդասէր Աստուած . ողորմած Աստուած . աղաչեմ , և զերեսս 'ի գետին եղեալ՝ արտասուօք թանամ զհող պատուանդանի ոտիցդ՝ և ինդրեմ հառաչանօք . զի 'ի մատչիլն իմ առ աղբւարդ ողորմութեան , մի բարկութիք խրատեր . և մի սրտմութեամբ յանդիմաներ . և մի մտաներ 'ի դատաստան ընդ ամենապարտաւոր ծառայիս՝ որ յամենայնի ախիբերան և անպատասլանի եմ առաջի քյ : Այլ հայեա յիս քաղցրութեամբ . և լուր զաղաչանս իմ՝ զոր անմաքուր

բերանովս .քեզ մատուցանեմ : Մեղայ յերկինս և  
առաջի քոյ որպէս զանառակ որդին : Ել ընդ ա-  
ռաջ սիրով՝ գրկեա գթութեամբ՝ և համբուրեա  
ողորմութեամբ : Թողլ ինձ զամենայն յանցանս իմ,  
զորս դու լաւապէս դիտես քան զիս . և ասա օրհ-  
նեալ բերանովդ թէ՝ թողեալ լիցին քեզ մեղք քո:

Դու ասացեր մարդասէր Աստուած թէ՝ առա  
զանօրէնութիւնս քո զի արդարացիս : Ահա՝ ա-  
սացի և ասեմ . մեղայ և անօրինեցայ միշտ առաջի  
քոյ . մեղայ քեզ տէր՝ և առաջի քոյ արարի զչար:  
Ուրեմն՝ արդարացն զիս ով ճշմարտաբանդ Աս-  
տուած :

Դու ասացեր մարդասէր Աստուած թէ՝ մեղա-  
ւորն եթէ դարձի առիս , ես գթացայց՝ ի նա . և  
'ի ծով ընկղմեցից զամենայն մեղս նորա : Ուրեմն՝  
կացո զբանս անլու.ծանելի հրամանաց քոյ ով դը-  
թած Աստուած . գթա՝ ի մեղաւոր ծառայս քո՝ որ  
առ քեզ եմ դիմեալ . և ընկղմեա՝ ի խորս ան-  
հուն ողորմութեան քոյ զամենայն մեղս իմ :

Դու ասացեր մարդասէր Աստուած . ես եմ որ  
ջնջեմ իբրև զմէգ զմեղս քո՝ և զանօրէնութիւնս  
քո ոչ ևս յիշեցից : Ուրեմն՝ հաւաստեա առիս  
զբան քո ով անսուտդ Աստուած . ջնջեա զամե-  
նայն մեղս իմ և անհետ արա . հատ և չորացո իս-  
պառ զարմատ մեղաց իմոց՝ զի մի ևս երևեսցի յիս ,  
և բարկացուցանիցէ զքեզ :

Դու ասացեր մարդասէր Աստուած . եթէ իցեն  
մեղք ձեր իբրև զձանձախարիթ , իբրև զձիւն սպի-  
տակ արարից : Կատարեա առիս զբան քո ով կա-

ըօղ Աստուած. զսեացեալս մեղօք՝ սպիտակացն և  
սուրբ արա յամենայն աղտեղութեանց :

Դու ասացեր տէր իմ և Աստուած իմ Յիսուս  
Քրիստոս՝ ՚ի ժամանակս փրկագործութեան քոյ  
թէ՝ ոչ եկի կորուսանել, այլ կեցուցանել. և թէ՝  
ոչ եկի կոչել զարդարս, այլ զմեղաւորս : Արդա-  
րացն զբանս քո տէր իմ. կեցո զմեռեալս մեղօք՝  
և մի թողուր կորնչիլ՝ զոր պատուական արեամբդ  
գնեցեր. Առչեա և զամենամեղաւորս ՚ի կապանաց  
մեղաց՝ և ՚ի բանտէ դժոխսին դործոյ՝ առ քեզ  
սիրով՝ որպէս զսիրելին քո զադարոս և կենդանա-  
ցն : Եւ ուրախաց. զհոգի և զմարմին իմ շնոր-  
հօք՝ որպէս զքորսն նորա :

Դու ասացեր Տէր իմ Յիսուս թէ՝ եկայք առիս  
ամենայն աշխատեալք և ծանրաբեռնեալք՝ և ես  
հանգուցից զձեզ : Իրաւացն զբանս քո առիս տէր  
իմ : Ահա ես աշխատեալս ՚ի պէսպէս մեղս՝ և  
ծանրաբեռնեալս անօրէնութեամբ՝ դիմեալեմ առ  
քեզ. ուրեմն՝ բարձ զծանրութիւն մեղաց իմոց .  
և թեթեացն զտառապեալս ո՛լ հանգիստդ աշխա-  
տելոց և քաւիչդ մեղաւորաց :

Ով տէր իմ Յիսուս Քրիստոս՝ գառնդ Աստու-  
ծոյ և բարձօղ մեղաց աշխարհի. դու վասն պյու-  
րիկ կրեցեր զայն քան սարսուելի չարչարանսն. և  
հեղլով զպատուական և զանգին արիւնդ՝ պատա-  
րագեցար ՚ի խաչին. զի փրկեսցես զմեզ ՚ի դժո-  
խոց, ՚ի յաւիսենական մահուանէ և կեցուցես :

Արդ՝ զնոյն սոսկալի չարչարանսդ և զպատուա-  
կան արիւնդ միջնորդ արկանեմ առ քեզ, և աղա-

չեմ. զի և ես մի եմ՝ լուրիելոցդ և կեցուցելոցդ։ Արա՝ զի մի ևս մեռանիցիմ՝ ի մեղս և կորիցեմ յաւիտենականապէս. և սուրբ արեանդ քո հեղումն՝ ի զուր լինիցի վասն իմ։ Ուրեմն՝ ի ոլատուական արիւնդ քո խնայեա ովլ տէր իմ. թող ինձ զամեռնայն մեղս իմ՝ զորս մինչեւ ցայժմ գործեալ եմ յիմարութեամբ իմով։ Եւ այսուհետեւ զսիրո սի և զհոգի ուղիղ նորոգեա յիս. զի մի ևս մեղիցեմ։

Տուր ինձ զերկիւղ քո սուրբ. և բեեռեա ՚ի նա զհոգի, զմիտ և զմարմին իմ։ Որպէս զի՝ միշտ երկնչիցիմ ես ՚ի սպառնալեաց և ՚ի դատաստանաց քոց. և խորշիցիմ և հեռանայցեմ՝ ի մեղաց և յամեռնայն թիւր գնացից. և զգուշանայցեմ միշտ ՚ի յօրէնս և ՚ի սպառուիրանս քոյ և ՚ի մտի ունիցիմ՝ հանապաղ զսոսկալի օր մահուն իմոյ և զահագին գատաստան քոյ։

Սուրբ պահեա տէր իմ, զհոգի, զմիտ, զխղճմըտանս և զամեռնայն զգոյարանս մարմնոյ իմոյ՝ յամեռնից յանհաճոյից քոց. ՚ի չար մատանանց, յաղտեղի խորհրդոց. յարառ հայեցուածոց. ՚ի մեղսառիթ լրոց. ՚ի դատարկ և ՚ի յանպատշաճ խօսակցութեանց, յարտուղի ընթացից, և յամեռնայն մեղսածին շարժմանց։

Աղաչեմ զքեղ տէր իմ և Աստուած իմ Յիսուս Քրիստոս, փրկեա զիս և սպահանեա յամեռնից թշնամեաց և յօրոգայթից նոցին և ՚ի բնաւից փորձութեանց հոգեկանաց և մարմնականաց. և մանաւանդ ՚ի ներկրիստական վշտացս և փորձանացս. (Ե՞՞ ունին պայմաններ, յիշութեաննո՞ւ)։

ԵՇՐ ընդիս հանապազ՝ ի յօդնել. և յընկերել  
ինձ փութա յամենայնում ժամու. ՚ի տուէ և ՚ի  
գիշերի. ՚ի տան և ՚ի յառնել. ՚ի դործել և ՚ի  
հանգչիլ. որպէս զի մի երբէք սասանեցոյց ։ Վ ասն  
զի՝ ՚ի քեզ անկայ ես յարգանդէ մօր իմոյ. դու  
ես յոյս իմ և ապաւէն ՚ի մանկութենէ իմմէ. դու  
ես յոյս իմ ՚ի ծերութեան իմոյ. և դու ես յոյս  
իմ և ապաւէն ՚ի մահուան իմոյ՝ և ՚ի միւսան-  
գամ գալստեանն քոյ. դու ես, և ոչ այլ ոք։

Տէր իմ և Աստուած իմ Յիսուս Քրիստոս. ա-  
հա հոգւովս, մոօքս, մարմնովս՝ և ամենայն պա-  
րագայիւքս, զիս յանձնեմ՝ ՚ի քո անհուն ողոր-  
մութիւնդ. և խնդրեմ, զի մի զրկիցես զիս ՚ի  
շնորհաց քոց. մի մերժիցես ՚ի խնամոց քոց. և  
մի թողուցուս զիս ՚ի կամս անձին իմոյ գնալ. այլ  
՚ի շնորհս քո պահեցես. ՚ի խնամս քո կառավա-  
րեցես. և ՚ի կամս քո առաջնորդեցես ինձ։ Որ-  
ովէս քո օրհնեալ կամացդ հաճոյ է, այնպէս ա-  
ռաջադրեցես ինձ առնել և շարժիլ՝ որ քան եմ  
՚ի կեանս այս ։

Իսկ՝ և ՚ի վճարիլ կենաց իմոց, աղաչեմ զքեզ  
տէր իմ. քոյ անարատ ծնողիդ միջնորդութեամբն.  
սրբոյն յօհաննու կարապետին. սրբոյն ստեփան-  
նոսի նախավկային. և սրբոց քոց առաքելոց, և  
սրբոցն՝ թաղէսօսի և բարդուղիմէսօսի և սրբոյն գրի-  
գորի լուսաւորչացն մերոց. և համայնից սրբոց  
քոց երկնաւորաց և երկրաւորաց աղօթիւքն և  
բարեխօսութեամբն. քո սուրբ նշանացն, սրբոյ  
Խաչի քոյ կենսատուի. սրբոյ կողամուխ Պեղար-

գեանդ քոյ . սրբոց սոսկալեաց ՅԱՆԵռաց և Փշե-  
ղէն պսակին քյ . և այլոց սրբոց գործեացն քոց  
չարչարանաց շնորհօք և միջնորդութեամբն , տուր  
ինձ՝ արթուն մոօք , ուղիղ դիտաւորութեամբ ,  
ծշմարիտ հաւատով , աներկբայ յուսով , առաքի-  
նական գործով , ստոյդ խոստովանութեամբ , ջեր-  
մագին զզջմամբ , սրբոյ և կենարարի Մարմնոյ և  
Արեան քյ հաղորդութեամբ գալ առ քեզ . և  
արժանանալ քումդ ամենացանկալի տեսութեան .  
և ընդ սրբոց երջանկաց և սիրելեաց քոց փառա-  
ւորել զքեզ ընդ հօր և ընդ սրբոյ հոգւոյդ , յա-  
ւիտեանս յաւիտենից . ամեն :

### ԱՅ ՀՈՒՅՏ ԽԱՌԱԿՈՎԵԼՈՒ ԺՈՒՄԻՆ :

Տէր եթէ զշրթունս իմ բանաս , բերան իմ եր-  
դեսցէ զօրհնութիւնս քո : (Օրհնեալ համագոյ և  
միասնական անբաժանելի սուրբ Երրորդութիւնդ՝  
հայր և Որդի և սուրբ հոգի . այժմ և միշտ և  
յաւիտեանս յաւիտենից . ամեն :

Գոհանամ զքէն տէր իմ և Աստուած իմ , և  
օրհնեմ և փառաւորեմ զսուրբ անուն քո . որ  
պահեցեր զանարժան և զմեղաւոր ծառայս քո 'ի  
գիշերիտ յայսմիկ յամենից վտանկից և 'ի փորձու-  
թեանց . և հասուցեր խաղաղութեամբ 'ի ժամ ա-  
ռաւօտուս , և արժանացուցեր տեսանել զլոյս ո-  
ղորմութեան քո :

Եւ այժմ աղաչեմ զքեղ տէր իմ և Աստուած  
իմ. սլահեա զիս և 'ի տունջեանս յայսմիկ նոյն ա-  
սմենազօր աջովդ, և փրկեա յամենից նսասաբեր  
պատահմանց. 'ի յերեելի և յաներեոյթ թշնա-  
մեաց, և յամենայն մեղսառիթ խորհրդոց՝ բանից  
և գործոց։ Եւ զգնացս իմ ուղիղ արա. զի մի  
տիրեացն ինձ ամենոյն մեղք։

Առաջնորդեա ինձ ի խորհուրդս բարիս, 'ի  
բանս ճշմարիսս, և գործս անմեղածինս և օգտա-  
կարս։

Դու լեր վերակացու և առաջնորդ սխալական  
ծառայիս քոյ յամենայն գնացս իմ. և փրկեա 'ի  
գոյթակղութենէ դիւին 'ի հասարակ աւուրս. և  
զգործս ձեռաց իմոց ուղիղ արա և յաջողեա ինձ։  
Եւ դու սլատրաստեա զպիտոյս հոգւոյ և մարմնոյ  
իմոյ։ Եւ հասն խաղաղութեամբ՝ առանց մեղաց  
և փորձանաց 'ի ժամ երեկոյին։ Օ, ի և յայնմ ժա-  
մու փառաւորեցից զսուրբ Երրորդութիւնդ՝ որում  
միշտ վայել փառք յաւ իտեանս յաւ իտենից ամեն։

Աշունք՝ 'ի յելս արեւու զի ծագման։

Դոյս 'ի լուսոյ ծագումն՝ արեգակն արդար, ան-  
ձառ ծնունդ հօր որդի յառաջ քան զարև անուն  
քո գովեալ ընդ հօր, 'ի ծագել լուսոյ առաւօ-  
տուս ծագեա 'ի հոգիս մեր՝ զւոյս քո իմանալի։

Աղօթչ յէլլրը ժամու առու:

Հոգի Վատուծոյ որ յայսմ ժամու ահազին շընչ  
մամբ իջեր ՚ի վերնատունն բաժանելով զհըե-  
ղէն լեզուս, էջ և առ մեղ յերրորդ ժամուս, և  
լից զմեղ ամենայն բարութեամբ քո՝ իբրև ըզ-  
սուրբ զառաքեալսն, հանգչելով ՚ի սիրտս մեր  
յաւիտեանս յաւիտենից ամեն:

Աղօթչ մըջօլեայ ժամու առու:

Վրեզական արդարութե տէր մեր Յիսուս Քրիս-  
տոս, որ ծագեցար ՚ի հայրական ծոցոյ, արձակե-  
լով զձառագայթս քո յմենայն տիեզերս: Իաց  
զաչս սրտից մերոց՝ տեսանել զհամասփիւռ լոյս  
քո, և հետեւել շաւզաց քոց. հալածեա ՚ի մէնջ  
զդէն ձանձրութեան, որ յայսմ ժամու մարտնչէ  
ընդ մեղ, ջերմացուցանելով զմեղ ՚ի մեղս և ՚ի  
սէր հիւթանիւթից. քպին շնորհօք փրկեա զմեղ  
յամենայն մեքենայից նորա ամեն:

Աղօթչ յէլէնոյէն ՚ի ժամ նոջմոն:

Գրոհանամ զքէն Տէր իմ և Վատուած իմ և  
օրհնեմ և փառաւորեմ զսուրբ անուն քո. որ  
պահեցեր զանարժան և զմեղաւոր ծառայս քո ՚ի

տունջեանս յայսմիկ . և հասուցեր խաղաղութեամբ  
'ի ժամ երեկոյիս :

Եւ այժմ աղաչեմ զքեզ տէր իմ և Աստուած  
իմ . որ արարեր զտիւն 'ի գործել՝ և զգիշերն 'ի  
հանգչիլ տկար բնութեանս մերոյ . արդ՝ տուը ծա-  
ռայիս քոյ ննջել մարմնով՝ և մնալ արթուն հոգ-  
ւով և մոօք :

Տէր իմ և Աստուած ահա ես ննջեմ , և ան-  
կեալ դնիմ որպէս դի անկենդան . և ո՛չ գիտեմ  
զերբ՝ և զ՞րպէս յառնելս իմ . վասն որոյ զհոգիս,  
զմարմին և զամենայն պարագայս իմ յանձնեմ 'ի  
յանհուն ողորմութիւնս քո . և խնդրեմ , զի զու  
ամենազօր աջովդ քո կնքեսցես զոեղի և զյարի ,  
զել և զմուտ ծառայիս քոյ . որով ննջեցից ապա-  
հով և աներկիւղ . խաղաղութեամբ և առանց փոր-  
ձանաց : Պահպանեա զիս յամենից թշնամեաց  
հոգեկանաց և մարմնականաց՝ և յորոգսյթից նո-  
ցին . փրկեա զիս յիշէն՝ որ շրջի 'ի խուարի . 'ի  
գիշերային երկիւղէ , 'ի դիւական ցնորմանց , և 'ի  
զարհուրեցուցիչ երևմանց : Աաքեա զմիտս իմ  
յամենից թիւը մտածմանց , յազտեղի խորհրդոց ,  
և յամենայն մեղսածին շարժմանց : Կացո՛ սպահա-  
պան և վերակացու յանցաւոր ծառայիս քոյ՝ զբա-  
նակս երկւայնոցդ զինուորութեանց ընդ իմոյ հրեշ-  
տակին . և զնշան ամենայաղթ խաչի քրիստոսիդ .  
որովք ննջեցից ապահով և աներկիւղ 'ի գիշերիս  
յայսմիկ , և ժամանեցից խաղաղութեամբ 'ի ժամ  
առաւօտուն . զի և յայնմ ժամու փառաւորեցից  
զհայը և զորդի և զսուրբ հոգիդ՝ որում միշտ վա-

յելէ փառք և երկրագութիւն յաւիտեանս յաւիտենից . ամէն :

**Յ**որժում ՚ի Տահիճ Տպանէն , զայն ապա՛ :

Տէր մեր Յիսուս Քրիստոս , որ անապական սթմարմառովդ իջեր ՚ի գերեզման , նոյնալէս և յարեար ՚ի մեռելոց , շնորհեած մեզ տէր՝ անապական խորհըրդով ննջել ՚ի մահիձս , և սրբութեամբ յառնել ՚ի մահահանգոյն քնոյս , ոչ ունելով զնշան աղտօղութեան ՚ի միտս , ՚ի սիրտս և ՚ի հոգիս , շնորհօք վրկչեղ և աղատողիդ մերոյ ամէն :

**Ա**լլօնէք ՚ի Տէջ Գէշէլին Տապա՛ :

՚Ի մէջ գիշերի յարուցեալ խոստովանիմք ըգ-քեզ տէր , փառաւորելով զանուն քո սուրբ , և խնդրեմք ՚ի քէն , հեռացո՞ ՚ի մէնջ զխաւարային խորհուրդս՝ ՚ի պատրանաց բանսարկուին պահելով՝ շնորհիւ ողորմութեան քո ամէն :

**Ա**լլօնէք յորժում ՚ի հնոյ զայն ապա՛նին , Տապա՛ :

Օրհնեալ է մեռեալն և յարուցեալն ՚ի մեռելոց Քրիստոս Աստուած , որ զարթոյց զիս ՚ի մա-

Հահանգոյն քնոյ, խաղաղութեամբ անցուցանելով  
զգիշերս, աղաչեմ և խնդրեմ, զի զմնացեալ ժա-  
մանակս խաղաղութեամբ պահեսցէ շնորհիւ և  
ողորմութեամբ իւրով ամեն :

**ԱՀՈՒՄ**՝ յորժամ ՚ի գործ ինչ չեւո՞ն արիցէս

Օգործս ձեռաց մերոց՝ ուղիղ արա՚ի մեղ տէր,  
և զգործս ձեռաց մերոց՝ յաջողեա՞ի մեզ:

**ԱՀՈՒՄ**՝ յորժամ էիշուցի Տպանես :

Օայր արիւնահեղ և զնենգաւոր պիղծ առնես  
դու տէր, այլ՝ ես ըստ բազում ողորմութեան  
քում, մտից ՚ի տուն քո և երկիրալագից ՚ի տա-  
ճար սուրբ քո. երկիրակիւ քոլ :

**ԱՀՈՒՄ** մասն հասակակ ննջեցէլսց, և Տպանես անդ  
մասն ընդունեաց և ելամիստեաց :

Այլ և աղաչեմ և խնդրեմ ՚ի քէն ով բազմա-  
գութ Աստուած՝ վասն ազգիս մերոյ հնոյ և նո-  
րոց և համօրէն հաւատով և յուսով ՚ի քեզ նըն-  
ջեցելոցն: Եւ մանաւանդ՝ վասն իմոց մարմնաւոր  
և հոգեսոր ծնողաց. եղբարց. քերց. ազգականաց,  
սիրելեաց և բարեկամաց. և հոգեսոր վարդապե-

տաց . 'ի բարիս կըթողաց և ուսուցչաց . և ամենայն  
աշխատաւորաց և երախտաւորաց մերոյ՝ 'ի քեզ  
ննջեցելոց : Օորս յիշեցես յողորմութիւնս քոյ  
յաւուր մեծի գալստեան քոյ . թողութիւն շնոր-  
հեցեցես ամենայն մեղաց և սխալանաց նոցին . և  
դասեցես ընդ սուրբս քո յաջակողման դասուն .  
և տացես լսել զերանաւէտ բարբառն քո թէ՛ ե-  
կոյք օրհնեալք հօր իմոյ : Եւ ըստ երախտեաց  
նոցին որ առ մեզ՝ միոյն բիւրապատիկս հատուս-  
ցես 'ի հոգիս նոցա . և զմեզ անդատապարտ ա-  
րացես 'ի նոցին պարտուցն . և քեզ փառք յա-  
ւիտեանս յաւիտենից . ամէն :

**Ա**շոնք ըստն լւշնու նշանացաց :

Արդ՝ ով ողորմած և բազմագութ Աստուած իմ  
Ծիսուս Քրիստոս . վասն իմոց ընտանեաց և բարե-  
բարաց խնդրեցի զբարիս և զողորմութիւնս 'ի քէն՝  
որպէս հարկն է , և պահանջէ օրէն բնութեանս  
մերոյ : Այժմ աղացեմ զքեզ և վասն իմոց թըշ-  
նամեաց . որպէս և դու իսկ ասացեր օրհնեալ բե-  
րանովդ թէ բարի արարէք առելեաց ձերոց : Ու-  
րեմն՝ անկեալ առաջի քոյ խնդրեմ յամենառատ  
ողորմութենէդ , զի ողորմեսցիս և իմոց ամենից  
թշնամեաց և ատողաց . չարակամաց և մսասատու-  
աց . և այլոց ամենեցունց՝ որք զծառայէս քումնէ  
զչարիս խորհին և խօսին գործեն , և զործել կա-

մին . որք բամբասեն՝ վատաբանեն , և հայհոյեն՝ դիս՝ թէ իրաւամբ , և թէ անիրաւամբ . մի՛ բարկանար նոցա վասն իմ՝ տէր իմ . այլ՝ ներեա և թռղ զմեղս նոցա :

Քանզի՝ նոքա առիս մեղանչեն՝ որ յիրաւի մեղաւոր եմ՝ և արժանի ամենայն բամբասանաց և նախատանաց : Ես առ քեզ մեղանչեմ՝ որ արդար եօ յամենայնի , և միշտ բարերար ինձ : Աւըեմ՝ եթէ նոքա արժանիք են բարկութեան քց , ապա՝ բիւրագատիկ ես եմ որդի բարկութեան և արժանի ողատժոց քան զնոսա :

Վասն այսորիկ՝ աղաչեմ զքեզ տէր իմ՝ որ ես աղբիւր ամենայն բարութեանց՝ և ծով անհուն ողորմութեան . զի ողորմեսցիս նոցա՝ և ինձ ընդ նոսա . և ներեսցես ամենից սխալանացն՝ որք առիս . և զարձուսցես զնոսա ՚ի չարեաց , փոխարկելով ՚ի բարիս : Որալէս զի ամեներեան զգաստացեալք՝ ըստ հաճոյից քոց դնասցուք . և փառս վերառաքեսցուք քեզ ընդ հօր և ընդ որբոյ հոգւսցդ . և միշտ և յաւիտեանս յաւիտենից . ամեն :

Աշունք ողջ էլլու գուշականք . մասն հասալու տղթես և եհեղեցնացն հայոց :

Եւ արդ՝ տէր իմ և Ասոռուած իմ Յիսուս Քրիստոս , ես ամենասխալ և բազում չարեօք և անօ-

բէնութեամբ լցեալ ծառայս քո՝ արդէն յերկիր խոնարհեալ՝ կորագլուխ անձամբ և մեծակական ողբով՝ ի խորոց սրտէ հառաջեմ առ ամենագթած աստուածդ իմ, և աղաչեմ : Վասն ողորմելոյ և անտիրացելոյ ազգիս մերոյ ազաղակեմ առ քեզ՝ ով ողորմելեաց ողորմած . անտիրացելոց տէր . անձարացելոց ճար . անօդնականից օգնական . անյօւսից յոյս և ապաւէն . նեղելոց և վշտացելոց հանգիստ և միսիթարութիւն : Վաչեմ առ քեզ մեծաւթախանձանօք , բաց տէր զասս քո , տես զողորմելութիւն մեր . տես զփոքրիկ հօտս քո թէ՝ որպէս է ցըուեալ և տարագրեցեալ ընդ ամենայն երկիր և մատնեալ՝ ի ձեռու օտար տերանց և թշնամեաց զրկեալք՝ ի սեպուհ բնակութեանց և ՚ի հայրենեաց իւրեանց :

Ո՛հ , որք են որպէս զնաւ ղեկաբեկ տառանեալք յալիս ծովու՝ առանց ղեկավարի և որպէս զոչխար մոլորեալք՝ ի յանապատի առանց հովուի : Եւ ոչ ունին զմօսէս որ առաջնորդեսցէ . և ոչ ունին ըզյեսու որ ընդդէմ թշնամեաց կացցէ . և ոչ ունին զդաւիթ՝ որոց վասն զհաճոյական պատարտգս մատուցցէ քեզ և զսուր բարկութե՛ քոյ յետս դարձուցէ : Եւ ոչ ունին զմարդարէ , թագաւոր , իշխան , և առաջնորդ . և ոչ զօդնութիւն իմն յուտեքէ :

Իշխանք մեր և ազատազունք՝ մերկացեալք յիշխանութեանց և յընչից՝ և անկեալք ընդ իշխանութեամբ այլոց՝ ծառայեն ողորմելաբար : Հասարակ ժողովուրդք մեր գրաւեալք՝ ի ներ-

Քոյ ծանր Ըստ և հարկի այլազգեաց՝ հաղիւ թէ  
հայթհայթանօք գտանեն զապրուստս կենաց իւ-  
րեանց և որոց զսերմանեալսն և զվաստակսն այլք  
տւտեն և վայելեն:

Եկեղեցիք վայելսագեղք և վանոքայք պայծառա-  
շէնք՝ որք յանուն քո և 'ի յիշատակ սրբոց քոց  
սիրելեաց կառուցան. Հոգւոյդ սրբոց օձմամբն կըն-  
քեցան. և ամենայաղթ խաչիդ նշանաւն պսակե-  
ցան: Յորս մատչեր պատարագ գառնդ Աստուծոյ  
'ի փրկութիւն աշխարհի. յորս կատարէին սրբա-  
գործ և հոգեկեցոյց խորհուրդք քո: Յորոց ելա-  
նէին և վերառաքէին առ քեզ ձայնք օրհնութեց  
և փառաբանութեանց, բուրմունք հոգեորականք,  
նուերք հաճոյականք և ազօթք հաշտարարք: Որք  
ահա ըստ մեծի մասին ամսյացեալք և ապակա-  
նեալք, դողոց և գաղանաց օթարան են դարձեալք:  
Յիրասի՝ ձեռաց թշնամին զձեռն 'ի ցանկալիսն  
քո: Մափին հեթանոսք 'ի ժառանգութիւնս քոյ  
և սրլծեցին զսորք տաճարս քո: Արահք և սրբ-  
բութիւնք նոցա դարձան յասլականութիւն: Առոգ  
առին ծանապարհք նոցա: Հատան երթևեկ տօնից  
տարեկանաց նոցա: Լուեցին 'ի նոցանէ ձայնք օրհ-  
նութեց և փառաբանութեց: Պաղանք և յափլշ-  
տակօղք մուտ և ել առնեն 'ի նոսա: Աբանչելա-  
րար դամբարանք և բժշկարար նշխարք սրբոց քոց  
որք 'ի նոսա, կոխան եղեն ոոից անսրբոց և սլրդ-  
ծոց. քահանայք և պաշտօնեայք նոցա հալածեալք  
փախստեայք աստ և անդ, շատքն ևս դերեցեալք,  
պապանեալք և անյայտ եղեալք: Ուստի՝ եղաք մեք

մն սցորդ քս նախատինք դրացեաց՝ և այդն կառականաց թշնամեաց մերոց :

Արդ՝ այս ամենայն ելին և գահ՝ 'ի վերայ մեր վասն մեղաց մերոց : Քանզի մեք մեղաք, անօրինեցաք, և ապատամբեցաք 'ի քէն . վասն սցորդիկ և դու թոյլ ետուր այս ամենայն չարեաց գալ 'ի վերայ մեր և տիրել մեզ, և մատնիլ 'ի ձեռաթշնամեաց տերանց ապատամբողաց . որպէս ահա եմք տառապեալք 'ի վերայ ամենայն երկը այսօր վասն մեղաց մերոց : Աւրեմն՝ աստուծոյդ մերթւմ արդարութիւն . և ամօթ երեսաց մերոց :

Արդ՝ այժմ՝ առ ովլ դիմեսցուք ովլ Աստուած մեր . և ում պատմեսցուք զցաւս մեր, եթէ ոչ քեզ բարկացելցոյ . զի որպէս արդարութիւն խրատեցեր և հարեր զմեզ . կարօղ ես և դու ողորմիւթեամբ անդրէն վերստին բժշկել և միփիթարիլ :

Վ ասն որոյ՝ ահա անկանիմ առաջի անոխակալիդ Աստուծոյ . և ըստ անառակին գոչեմ, մեղաք յերկինս և առաջի քոյ . մեղաք ստեղծողիդ մերոյ . մեղաք բարերարիդ մերոյ և Աստուծոյ :

Աղաչեմ զքեզ անոխակալ Աստուած գարձիր 'ի բարկութենէ քումմէ՝ և անցո 'ի մէնջ զցասումն քո . մի յիշեր զմեզս մեր զառաջինս . վաղվաղեսցէ առ մեզ ողորմութիւն քո . զի աղքատացաք յոյժ : Օ արթիր՝ տէր, զարթիր . արի և մի մերժեր զմեզ իսպառ : Մ'ի մոռանար զաղքատութիւն և զնեղութիւնս մեր : Արի տէր՝ օգնեա մեզ և փրկեա զմեզ վասն անուան քոյ որ կոչեցեալ է 'ի վերայ մեր : Մ'ի մատներ զմեզ իսպառ վասն ա-

նուան քց . մի ցրեր զուխոս քո . և մի 'ի բայեայ  
առներ զողորմութիւնս քո 'ի մէնջ : Օկ դու մի-  
սյն ես փրկիչ մեր և օգնական . դու միսյն ես ա-  
պաւէն մեր և յոյս : Օկ բաց 'ի քէն զայլ ոք ոչ  
զիսեմք . և զանուն քո կարդամք հանապազ : Տես  
զտառապանս ազգիս մերոյ . հաս յօդնութիւն և  
սյց արա :

Եւ որպէս դժայիր հնոյ ժողովրդեան վասն աբ-  
րահամու , իսահակոյ , յակորայ և վասն դաւթիւ-  
ծառայից քոց . դժա և այժմ նորոյ ժողովրդեանդ  
և փոքու հօտիդ , վասն սրբուհւոյ Աստուածածնի .  
անարատ ծնողի քց . և սրբոյն Յօհաննու կարա-  
պետին և մլրտչին քց . սրբոյն Վաեփաննոսի նախ-  
կին վկային քց . սրբոց Առաքելոց և Մարդարէ-  
իցն քոց . և սրբոց Առաքելոցն և յատուկ լուսա-  
ւորչացն մերոց Թագէոսի և Յարդուղիմշոսի , և  
սրբոյն Գրիգորի բազմաչարչար վկային քոյ . և նո-  
րին Որդւոց և Թոռոանց ընտրելոց ծառայից քոց .  
և սրբոց Հոփիսիմեանց և Գայիանեաց յաղթօղ  
վկայիցն քոց : Եւ բարեխօսութեամք սրբոց Հոյ-  
րապետաց և Վարդապետաց . Շնաւորաց . Մար-  
տիրոսաց . Կուսանաց . և ամենից սրբոց քոց հնոց  
և նորոց՝ յայտից և անյայտից :

Այլ և բարեխօսութեամք սրբոց քոց երկնա-  
ւորացդ՝ Գարբիկէլի և Միքայէլի և ամենից ան-  
մարմնական դասուցդ :

Օկ եթէ վասն բազում մեղաց մերոց և անօ-  
րէնութեանց , առ ժամանակ մի թողեր զմեղ . դար-  
ձուցեր զերեսս քո 'ի մէնջ և տրտմեցուցեր . վասն

պատուական արեան քոյ՝ և վասն արդարութեան  
սիրելեաց քոց՝ ղարձ առ մեզ. և ողորմութեամբ  
քով մեծաւ՝ ողորմեաց մեզ. երևեցո՛ զերեսս քո-  
մեզ՝ և ուրախացո՛ զմեզ, որպէս ասացեր առ եաս-  
յեաւ: Ասեցո՛ և մեզ զայն երանաւէտ ձայնն թէ՝  
լուսաւորեա եկեղեցիդ հայատանեաց և ուրախ  
լեր. զի հասեալ է լոյս քո: Ահաւասիկ ես զար-  
ձուցանեմ՝ ի քեզ զիսաղաղութիւն իբրև զգեա. և  
զմանկունս քո՝ ի հեռաստանէ՝ ի վերայ ուսուց իւ-  
րեանց բարձեալ բերիցեն: Յիրափի այդպիսւոյ ա-  
մենակարողի Աստուծոյ ողորմութեանն եմք մնա-  
ցեալ ապաստան՝ ողորմած Աստուծօ:

Ուրեմն հաշտեաց ընդ մնացորդաց ժողովրդեան  
քոյ. փրկեա զմեզ մեծաւ սքանչելեօք. ժողովեա  
զմեզ՝ ի գոդ սիրոյդ և միսիթարեա, ՚ի փառա ա-  
նուան քոյ որ կոչեցեալ է՝ ի վերայ մեր:

Այլ և աղաչեմ զքեզ տէր իմ և Աստուծօ  
իմ վասն ամայացելոց և անշքացելոց վանորէից և  
եկեղեցեաց մերոց: Առը մեզ՝ որք ահա նեղեալ  
անձամբը՝ աղաղակեմք առ քեզ:

Մի յիշեր զմեզս մեր որք բարկացուցաք զքեզ.  
այլ յիշեա զսուրբսն քո՝ որոց յանուն կառուցան  
եկեղեցիք մեր: Օսուրբ՝ և զմաքուր նշխարս նո-  
ցա՝ որք ամփոփեալք են՝ ի նոսա. և զսրբութիւն  
յորոց վերայ անուն քո կոչեցեալ է:

Եւ ոչ եթէ վասն արդարութեան իմոյ արկանեմ  
զայս աղերս առաջի քոյ, այլ՝ վասն բազում գթու-  
թեան քոյ, և վասն սիրոյ սիրելեաց որբոց՝ և սըր-  
բութեանց քոց:

Ուրեմն՝ աղազեմ՝ զքեզ՝ ողորմած Աստուած՝  
դթած Աստուած. վասն անհուն ողորմութե քոյ.  
՚ի սէր սրբոց եկեղեցեաց և սրբութեանց քոյ.  
բարեխօսութեամբ քեզ հաճոյացելոց սրբոցն քոյ.  
և միջնորդութիւնոցին չարչարանացն՝ պատուա-  
կան արեանն, և մաքուր նշխարաց և դամբարա-  
նացն. ողորմեա և այց արա; Որպէս տառապե-  
ցուցերը բարկութեամբ, նմանապէս թժշկեա և  
միջիթարեա ողորմութեամբդ; Օք որպէս տեսոին  
աչք մեր զամայութիւն և զապականութիւն նոցին  
վասն մեղաց մերոց, տուր մեզ՝ աեսանել վերս-  
տին զվերանորոգութիւն և զպայծառութիւն նոցին  
վասն սիրելեաց սրբոց քոյ:

Եւ որպէս հատան և լոեցին ձայնք օրհնութեց  
և փառաբանութեանցն ՚ի նոցանէ, արա՝ զի վերս-  
տին զօրասցին և բարձրասցին ՚ի փառս անուան  
քոյ. զի ծանիցեն ամենեքեան թէ՝ կոչեցեալ է  
անուն քո ՚ի վերաց մեր՝ և նոցա; Օորս և մեր  
տեսանելով՝ վերառաքեսցուք փառս և գոհութիս  
՚ի յերկինս քեզ՝ ընդ հօր և ընդ սրբոյ հոգւոյդ.  
այժմ և միշտ և յաւիտեանս յաւիտենից. ամէն:

Ըստ հայութաւութիւնս առ ԱՀՅ՝ մասն յատաւէ բո-  
րելութաւութիւնն առս առ աղջու հայոց: Եւ ինդիւթ-  
ածս գալիքնեալ, զի իւ ես սպարմեսցի, և բարելութեսցի:

Վերակրկնելով զպաղատանս իմ արդէն՝ առ ո-  
ղորմածդ Աստուած՝ խնդրեմ և վասն մնացորդացն

աղդիս մերոյ : Այսինքն՝ վասն վանորէից . և եկեղեցից . և վասն եկեղեցականաց և բոլոր ժողովը զեանս մերոյ . զի զորս պահեալ ես մինչև ցայժմ՝ ի հաստատութեան և ՚ի բարեկարգութե՛ , աղաճեմ մեծաւ թախանձանօք , զի և ևս պահեսցես ՚ի խընամաքց ՚ի փառս անուանդ քում սրբոյ :

Մ' հայիր ՚ի մեղս իմ և յանարժանութիւնս իմ . այլ հայեաց ՚ի քոյ անսպառ սէրդ և յանբաւ մարդասիրութիւնդ :

Եւ զորս խնդրեմ ես ըստ իմց սխալկոտ բնութեանս , և ըստ տկար մտացս , դու կատարեան զինդիրս իմ քոյով ամենագէտ և անսխալ իմաստութեամբդ . որ լաւապէս գիտես զպէտս և զօդուտս մեր՝ քան զոր մեք խնդրեմք և իմանամք :

Արդ՝ յառաջ քան զինդրուածս իմ , իրը զաղերս տարածեալ առաջի աստուծոյդ իմց զգլսաւոր և զմեծամեծ բարերարութիւնսդ . զորս արարեալ ես յատկապէս ազգիս հայոց՝ յիշեմ մեծաւ շնորհակալութեամբ : ՞ի եթէ ոչ վասն մերոյ արժանաւորութեանն , գոնէ՝ ՚ի նոսա խնայելով , զթասցիս ՚ի մեզ , և ևս ողորմեսցիս :

Արդ՝ նախապէս ՚ի յիշումն ածեմ առ քեզ՝ ով տէր իմ Յիսուս Քրիստոս . զքոյակերտ և քոյահաստատ Աթոռդ՝ և ըստ հոգւոյ ծնօղն մեր զսուրբն Խջմիածին : ՞որ քոյով իջմամբդ հիմնարկեցեր . աստուածայնով լուսովդ ձեւակերպեցեր . և ամենիմաստ ծարուարապետդ կառուցեցեր . և հաստատեցեր : ՞սուրբ Խջմիածին ասեմ՝ զոր իրը զի պայծառադոյն արեգակն ծաղե-

ցեր՝ ի դաշտն արարատեան . և որպէս զմի լուսա-  
տու և պատուական ակն փրայլեցուցեր՝ ի քաղաքն  
վաղարշառատ . զոր իբրև զմի շտեմարան անտա-  
ռելի շնորհացդ կազմեցեր՝ ի յազգս հայկազեան .  
և իբրև զմի մշտաբուղիս ազբիւր հոգեսպարար սպար-  
գեացդ բզիսեցուցեր՝ ի վիճակս թորգոմեան : Ա ասն  
օրոյ՝ ցանկալի և նուխանձելի զնա արարեր՝ ի յաչս  
ամենայն ազգաց և աշխարհաց : Իսկ՝ և զայս միակ՝  
գերազանցագոյն , և անհամեմատ սպարգես , յատ-  
կական սիրով մեզ հայազնեիցս , և քումդ փոքու-  
հօտիդ շնորհեցեր : Եւ ոչ միայն այս , այլև բազ-  
մօք եզանակօք յառկացուցեր զազգս մեր յատուկ  
սիրով՝ ի մէջ ամենայն ազգաց :

Քանզի՝ են թէպէտ իւրաքանչիւր ազգաց և ժո-  
ղովրդոց Աթոռք և եկեղեցիք , սակայն ոչ են լու-  
սաձեւ և աստուածակերո՛ որպէս Աթոռն մեր ոք  
Խջմիածին :

Են թէպէտ այլոց ազգաց հաւատացելոց հովու-  
սպետը և լուսաւորիչք սուրբք , սակայն ոչ են՝ ի  
հնգետասան ամս՝ ի բովս փորձութեան բաղմատե-  
սալ չարչարանօք մաքրեալք , սպարզեալք և՝ ի մա-  
հուն կենդանի մն սցեալք , որպէս Առւսաւորիչն  
մեր սուրբն Պրիգորիոս :

Են թէպէտ այլոց ազգաց դիր և տառ՝ մարմնա-  
ցուցիչ անմարմնոյ և աստուածայնոյ բանիդ , սա-  
կայն՝ ոչ են յատկապէս՝ ի քէն շնորհեցեալ և  
մատահը քով գծեցեալ որպէս դիրս մեր :

Առեցեր թէպէտ զազգս բազումս առ քեզ՝ և  
հաւատացեալս քեզ արարեր , սակայն՝ քարոզու-

թեամբ և վարդասկետութեամբ սրբազանից առաքելոց և աշակերտացն քոց : Իսյոյ՝ զազգս հայոց (որովհետեւ էր յատուկ քեզ սիրելի), ոչ շատացար աշակերտօք և քարոզութեամբ առ ձեռն բերել . այլ որպէս թէ՝ աշխատեցար անաշխատդ և ամենակարօղդ Աստուծած և հոգացեր այնքան, մինչդի՝ բռնութեամբ և անօրինակ հրաշխոք առ քեզ կոչեցեր, և քեզ սեփական ժողովուրդ արարեր :

Այլոց ազգաց՝ թագաւորս և մարմնաւոր իշխողակարգեցեր . մեզ հայոցս ազգի՝ և քոմդ փոքեր հօտի՝ զու ինքնդ եղեր թագաւոր՝ տէր և իշխան : Աւանդելով և մեզ թէ՝ իմ և իմայնոց թագաւորութիւն չէ յայսմ աշխարհի : Եւ թէ՝ որք քրիստոսանքն են, զմարմինս իւրեանց ՚ի խաչ հանիցեն . ըստ սրբոյն պօղոսի հարազատին քոյ :

Եւ որ երբեմն տանջես զմեզ և խրատես ձեռօք այլազգեաց, այն ևս հայրականի և յատկականի սիրոցդ են ցոյց . զի զոր սիրես, խրատես և յանդիմանես : Արք ամենեքեան են նշանք և քարոզք քումդ յատկականի և գերազանցագունի սիրոց և գթութեդ՝ զորս ունիս առ խլձալի ազգս հայոց :

Յիրաւի՝ ով տէր իմ, ոչ այսպէս արարեր այլոց ազգաց և ժողովրդոց՝ որպէս արարեր մեզ :

Արդ՝ այսքանեաց բարերարութեանց քոց զիստ խարէնն՝ զոչ այլ ինչ ունիմբ հատուցանել քեզ . միայն թէ՝ զիառս, և զգոհութիւնս շնորհակալութեամբ հանդերձ՝ քեզ անկարօտիդ Աստուծածայ մատուցութ յաւիտեանս յաւիտենից :

Արդ՝ որ զմեծագոյնսն և զգերազանցագոյնսն ա-

բարեր, զվոքը բաղդոյնսն և զհեշոականսն մի խնայեր՝ ի մէնչ ովլ բարերար և ողորմած Աստուածառ որ ամենայն ինչ կարելիք են և դիւրինք:

Ուրեմն աղացեմ՝ զքեղ ովլ բարերար և ողորմած Աստուածառ զքոյահաստատ Աթոռն և զմայրն մեր սուրբ Խջմիածին՝ (զոր իբր յատուկ փառք, պարձանք և մսիմարութիւն մեզ հայազնէիցս և լուսաւորչակիրօն հօտիս շնորհեցեր), հաստատուն և անշարժ պահեա զնա ՚ի վերաց անխախտելի վեմիդ՝ ըստ անսուտ խոստանդ քոյ:

Ննալակաս արա ՚ի նմանէ զմշտաղեղ և զհոգեպարար շնորհս հոգացոյ սրբոյ մինչև ՚ի կատարած աշխարհիս՝ ՚ի մսիթարութիւն և ՚ի զուարձութիմեզ՝ և եկեղեցեացս մերոց:

Օնա՝ զոր հաստատեցեր ՚ի մեզ, զօրացոյ և սրացառացո օրբատօրէ՝ և փայլեցոյ ընդ ամենայն ծագսերկի՝ ՚ի փառս անուանդ քում սրբոյ:

Օսուրբ Տեղին ոտից քոց միշտ փառաւորեալ յացս ամենայնի ըստ ճշմարիտ խոստանդ քոյ:

Փշրեա ամենակարօղ զօրութեամբոդ և խորտակեա որք հարցին ընդ վէմն այն. և կուրացոյ զացս այնոցիկ որք նենդութեամբ հային ՚ի նա:

Օարդարուն և սկերծ պահեա զնա միշտ քոյալնտիւ Հայրապետօք. շնորհափայլ Եպիսկոպոսօք և Վարդապետօք՝ և ամենայն մանկամբք:

Ե՞ր օգնական և ձեռնտու ներկայացելոյ Հայրապետին մերոյ (այս անուն) Աաթուղիկոսին՝ յամենայնում ժամու ՚ի յամենայն քոյահաճոյ գործո և յընթացս նորին: Պահեա զնա խաղաղութեամբ

և երկար ամօք՝ 'ի պայծառութիւն քումդ սրբոց  
տան, և 'ի մխիթարութիւն ծառայիցս քոց :

Եւ ընդ սրբոց Աթոռոյն մերոյ՝ պահեան և զայլ  
ամենայն Վանորայս և զԵկեղեցիսս մեր. հան-  
գերձ Առաջնորդօք Վարդապետօք, Քահանա-  
յիւք, Խշանօք, Ժողովրդովք, և ամենայն ման-  
կամբք նոցին՝ 'ի շինութեան, 'ի բարեկարգութեն,  
և 'ի խաղաղութեան. ազատ և անարատ յամենից  
օտար և 'ի թիւր աղանդոց :

Օքո ամենայաղթ զօրութիւնդ. զանպարտելի  
նշան սուրբ խաչիդ. զբանակս երկնային զինուո-  
րութեանցդ, և զդասս ամենից սրբոց քոյ՝ կացո-  
պահապան եկեղեցեացս մերոց և սոցին մանկանց՝  
զտիւն ողջոյն և զգիշերն ողջոյն. և փրկեա յա-  
մենից հոգեոր և մարմնաւոր թշնամեաց և փոր-  
ձութեանց. զի փառաւորեսցի 'ի նոսա անուն քո  
յաւիտեան :

Տէր Աստուած մեր, տուր հոգեւոր Հովուաց  
մերոց և Առաջնորդաց՝ զբոյաշունչ իմաստութիւն՝  
զքոյապատուէր հեզութիւն և զխոնարհութիւնն.  
որպէս զի՝ ըստ կամաց քոց հովուելով զհօտս քո,  
'ի յերեխիլ հովուարկեախիդ, կարիցեն ասել համար-  
ձակութեամբ՝ ահա ես և մանկունք իմ. և ընդու-  
նիլ 'ի քէն զփառացն պսակ :

Սպառազինեա զնոսա զօրութեամբ և արիութիք՝  
զի կարիցեն ընդդէմ կալ ոչխարամորթ դայլոց և  
ապականչաց եկեղեցեաց և կրօնից մերոց :

Տուր քահանայից մերոց զդաստութիւն և մաք-  
րութիւն : Որ զէս զի՝ կարիցեն արժանապէս ծա-

ուայել քումդ սրբոյ խորհրդոյ . և լինիլ համարածակ միջնորդ աստուծոյդ և ժողովրդեան՝ զաղօթանոցա քեզ մատուցանելով և զողորմութիւնս քո առ նոսա իջուցանելով , որք և ըստ հաճոյից քոց շահելով գոտուեալ մնասն քո , առցեն ՚ի քէն ըզբազմապատիկոն :

Տուր տէր սարկաւագաց , դպրաց և ամենից մանկանց եկեղեցեաց մերոց՝ զպարկե շտութիւն և զուսումնասիրութի : Որպէս զի՝ իւրաքանչիւրքն յոր կոչումն կոչեցեալ են , ՚ի նմին կացցեն առանց արատոյ . արժանապէս ծառայեցեն եկեղեցւոյ քում սրբոյ . և կոչիցին ՚ի քէն ծառայ բարի , ազնիւ և հաւատարիմ :

Ընկանական տէր զաշխատանս աշխատաւորաց , և զնուէրս տուողաց եկեղեցւոյ քում սրբոյ ՚ի փառե և ՚ի հաճոյս քոյ . և տուր նոցա փոխարէն զբազմապատիկս ըստ հոգւոյ և ըստ մարմնոյ և արա արժանի այնմ երանութեանն՝ զոր ողորմածքն ժառուանգեն :

Տուր տէր՝ իշխանաց և գլխաւորացն ժողովրդեանս մերոյ՝ զբարեպաշտութիւն և զսերտ հաւատո՞ւ առ քեզ : Զսէր և զմիաքանդութիւն՝ առ միմեանս . և զգութ և զինամածութիւն՝ առ աղքատս և փորձանաւորս : Քազցրացո՛ և սիրեցո՛ ըզնոսա յաչս ամենայն իշխողաց և բռնաւորաց որպէս զի լինիցին՝ պարծանք և ուրախութիւն եկեղեցւոյդ քոյ , ձեռնտու և միսիթարութիւն հասարակութեանն , և հաճոյական ծառայք քեզ . և առցեն ՚ի քէն զվարձս ընդ ամենայն սուրբս քո :

Յիշեա տէր զբոլոր ազգս մեր՝ զփոքրիկ հօտս  
քո զամենեսեան, ուր և իցեն. զմեծս և զփոքունս.  
զարս և զկանայս. և ոյց արա ամենեցունց վասն  
մեծի ողորմութեան քոյ : Տուր ամենեցունց կեալ  
սիրով և խաղաղութեամբ . լուսաւորչաւանդ հա-  
ւա ոով և առաքինական գործով . ապահով կենօք  
և բարուոք կենցաղավարութեամբ : Ե՞ր ամենե-  
ցունց ձեռնտու և օգնական յամենայն ժամանակի.  
՚ի ննջել և ՚ի յառնել. ՚ի տան և ՚ի ճանապարհի.  
՚ի ծովու և ՚ի ցամաքի . ՚ի յառս և ՚ի տուրս . ՚ի  
վարս և ՚ի վաստակս : Եւ զամենայն օգտարար և  
ահմեղածին գործս նոցա յաջողեա և ՚ի բարին ե-  
զերեցն :

Եյլև զհիւանդացեալսն և զցաւագնեալսն ա-  
ռողջացն : Օտրտմեալսն և զվշտացեալսն ախոփեա  
և ուրախացն : Օբանտարկեալսն և զգերեալսն  
ազատեա : Օփորձանաւորսն փրկեա : Պակասաւօ-  
ւորացն լից զպակասութիւնսն հոգեկանօք և մարմ-  
նականօք : Եմենայն անձարից և անօգնականաց  
հաս յօգնութիւն և այց արա : Օանդարձսն և ըզ-  
յամառեալսն ՚ի մեղս, դարձն՝ ՚ի չար ճանապար-  
հաց իւրեանց : Եւ ամենեցունց ողորմեա ըստ մե-  
ծի ողորմութեան քում, և ոլահեա . ՚ի խաղաղու-  
թեան : Որպէս զի՞ ամենեցունց ողորմելով՝ յամե-  
նեցունց փառաւորեսցիս միշտ :

Եյլև խնդրեմ ՚իքէն տէր իմ և Եստուած  
իմ. զի տացես ամենայն աշխարհայ զխաղաղու-  
թիւն . թագաւորաց հաշտութիւն . ստորագրելոց  
տէր և հնազանդութիւն . քաղաքաց, գաւառաց և

գիւղորէից շինութիւն և ապահովութիւն . այգեաց և անդաստանաց պտղաբերութիւն և ամենայն բարեաց լիութիւն և առատութիւն :

Այլև բարձես քոյով ողորմութեամբդ յամենայն աշխարհաց և ազդաց , և մանաւանդ՝ յերկրէս և յազդէս հայոց , զամենայն ցասոմն և զայլ ազդի ազդի ձախորդութիս . զհիւանդութիս և ըզմէսպէս ցաւս . զսով , զսուր և զմահտարաժամս . և զսյլս ամենայն վշտաբեր և զմնասատու պատահմունս . որք յամենազօր հրամանէդ շարժեալք՝ գան ՚ի վերայ մեր վասն մեղաց մերոց : Որպէս զի յամենայնի և յամենեսեան անուն քո վառաւորեացի յաւիտեանս յաւիտենից . ամէն :

Աշունք առ ամենատառը Աճածինն Մարիս :

Յետ այսքան վշտագնեալ անձամբ՝ բաղիսելոյ զղուոն ողորմութեան Աստուծոյ մերոյ և միածնի որդւոյ քոյ Յիսուսի Քրիստոսի , սյժմ լալագին դիմօք առ քեզ դիմեմ՝ զմաքուր ոտիւք քովք փարիմ և բաղիսեմ զդուոն մօրդ ողորմութեան՝ ով ամէնօրհնեալ սուրբ Աստուածածին Մարիամ : Եւ զոր ինչ ՚ի յորդւոյ քումմէ խնդրեցի , խնդրեմ և ՚ի քէն . և զորս յուսացայ գտանել ՚ի նմանէ , յուսամ և ՚ի քէն գտանել :

Քանզի՝ դու հարսն եղեր Աստուծոյ Հօրն ամենակալի՝ որ յամենայնի կարօղ է և բաւական :

Ապր եղեր Որդւոյն Աստուծոյ, որ յամենայնի  
ողորմած է և մարդասէր :

Հնակարան եղեր Հոդւոյն Աստուծոյ՝ որ յամե-  
նայնի հարուստ է և առատ :

Միանգամայն շտեմարան և գանձարան եղեր ա-  
մենասրբոյ Խրորդութեանն՝ որ աղբիւր է ամենայն  
բարութեանց և լցուցիչ երկնաւորաց և երկրա-  
ւորաց :

Երդ՝ ով սուրբ Աստուծածածին Մարիամ։ Հայ-  
ըլն Աստուծած որ այնքան սիրեաց զքեզ, մինչ զի՝  
զմիակ միածին որդին իւր՝ որով արար զամենայն  
արարածս, քեզ շնորհեաց և որդի քո արար։ այլ  
զի՞նչ իցէ խնայելոց ՚ի քէն։ Որդին Աստուծած  
որ այնքան սիրեաց զքեզ, մինչ զի՝ բնակեցաւ  
յարգանտի քում, բազմեցաւ ՚ի գիրկս քոյ։ և  
որ կերակրիչն էր ամենայնի, կերակրեցաւ ՚ի յը-  
տեանց քոց։ և որ Աստուծած և տէր էր քո, եղեւ  
որդի քո՞ւ և կոչեաց զքեզ մայր։ այլ զի՞նչ խնդրի-  
ցես ՚ի նմանէ զոր խնայիցէ ՚ի քէն։ Եւ Հոդին  
Աստուծած որ այնքան սիրեաց զքեզ, մինչ զի՝ զէ-  
ակիցն իւր քեզ հաւատաց։ և ինքն որ զարդարի-  
չըն է ամենայնի՝ հանգեաւ ՚ի քեզ, և արար ըգ-  
քեզ օթարան անսպառելի շնորհացն իւրոց։ այլ  
զի՞նչ մնասցէ սլակաս զոր ոչ ունիցիս դու։

Քանզի հաւատամ ճշմարտիւ։ զի ըստ բանի  
հրեշտակին, տէրն և ամենայն շնորհաց տուօղն  
ընդ քեզ է և որդի քո։ և ՚ի գիրկդ քո ունիս։  
Եւ զոր որդիդ քո ունի, քո է։ և զոր ինչ խնդրի-  
ցես ՚ի դմանէ, ոչ խնայի։ և դու ում կամիցիս,

կարօղ ես տալ : Որպէս և որդիդ քո ասէ բերանով սողոմոնի թէ՝ խնդրեա՞ մայր իմ . զի զոր ինչ և խնդրիցես , ոչ դարձուցից զերեսս իմ :

Ուրեմն՝ ով սուրբ Աստուածածին Մարիամ . զինի Աստուծոյ՝ դու ես ակնկալութիւն արարածոց նորին : Դու ես ուրախութիւն տրտմեցելոց . փրկիչ փորձանաւորաց , օգնական և միսիթարութիշ հաւատացելոց . և յոյս և ապաւէն մեղաւորաց :

Այսու մաօք՝ և սիրելի որդին քո ՚ի խաչին՝ իբրև զկտակ աւանդեաց քեզ զհաւատացեալս իւր ՚ի ձեռն յօհաննու . ասելով թէ՝ կին դու՝ ահա որդի քո : Իբր թէ՝ հաւատացեալքս իմ , քո են . և քեզ են յանձին այսուհետեւ : ‘Եղնալէս՝ և անուամբն յօհաննու՝ մեզ հաւատացելոցս առաց թէ՝ ահա մայր ձեր . զոր ինչ և կամիցիք , ՚ի դմանէ խնդրեցէք այսուհետեւ :

Արդ՝ ով մայր ողորմութեան սուրբ Աստուածածին Մարիամ . և ես մի եմ ՚ի հաւատացելոցն սիրեցելոյ որդւոյ ք'յ : Որ գոլով ըստ հոգւոյ և ըստ մարմնոյ ողորմելի՝ և յամենայնի սպակասուոր , կարօտիմ . քումդ մայրականի գթութեան : ‘Եղեալ և վշտացեալ ՚ի հոգեսոր և ՚ի մարմնաւոր թշնամեաց , կարօտ քումդ օգնականութեան : Մեղաւոր և յամենայնի յանցաւոր , կարօտ քումդ ձեռնտութեան և յուսաղրութեան :

Վասն որյ՝ անկանիմ առաջի քո ով սուրբ Աստուածածին և աղաչեմ զքեզ : Ուրախացո՛ զտառապեալ ծառայս քո և միսիթարեա՞ : Լից զպակասութիւնս հոգւոյ և մարմնոյ իմոյ՝ քոյով ան-

նուազելի շնորհօքդ։ Փրկեա զիս 'ի հոգեոր և 'ի  
մարմնաւոր թշնամեաց և յամենից փորձութեանց՝  
քոյով անտկարանալի զօրութեամբդ։

Արբեա և մաքրեա զիս յամենից մեղաց իմոց՝  
քոյով սուրբ և անարատ կուսութեամբդ։

Եւ լե՛ր միջնորդ և բարեխօս առ միածին որ-  
դին քո վասն իմ մեղաւոր ծառայիս. զի ընկալցի  
զաղաչանս իմ, զոր մատուցի նմա. և կատարեացէ  
զիսնդրուածս իմ։ 'Եւրեսցէ սխալանացս՝ և թո-  
ղութիւն շնորհեսցէ ամենայն մեղաց իմոց. ընկալ-  
ցի զիս վերստին 'ի սէր և 'ի խնամս իւր. և պա-  
հեսցէ զիս ըստ հաճոյից կամաց իւրոց, որ քան  
'ի մարմնի եմ։ Եւ յետ աստեացս՝ արժանացուա-  
ցէ իւրոյ օրհնեալ տեսութեանն։

Քանզի՝ հաւատամ անկարծիք՝ ով Մայր ողոր-  
մութեան զի եթէ անդամ մի ակն ածիցես վասն  
իմ առ որդիդ քո սիրելի ուրախութիւն է ինձ լիո-  
վին՝ և յամենայնի ասլահովութիւն։ Եթէ անդամ  
մի՝ զմաքուր ստինսդ ցուցցես նմա, բաւական փըր-  
կութիւն է ինձ՝ և յամենայնի ազատութիւն։ Եւ  
եթէ զշիթ մի 'ի սուրբ արտասուացդ՝ (զոր հեղեք  
'ի ժամ խաչելութեան նորա), 'ի յիշումն ածիցես  
նմա, թողութիւն է ամենայն մեղաց իմոց՝ և բո-  
լորովին կեանք յաւիտենական։ Որք քեզ առա-  
տագիծ մօրդ ողորմութեան՝ ամենայնիւ դիւրինք  
և կարելիք են և ինձ ողորմելոյ ծառայիս քոյ՝ ա-  
մենայնիւ պիտանիք և հարկաւորք։ Եւ իմ գտեալ  
զողորմութիւն 'ի քէն, փառաւորեցից զիլրդիդ  
քո միածին՝ ընդ Հօր և ընդ սրբոյ Հոգւոյն. և

զՄայրդ ողորմութեան գոհութեամբ բարեբանեցից . յաւիտեանս յաւիտենից . ամեն :

Առաջնակ և հառաջանս առ երջանելի սբան այց , և  
առ յափունի լուսաւորիչն և ելափուտուքոն աղ-  
գիս հայոց :

Յետ այսքան հառաջանաց և աղաղակաց , աղօ-  
թից և պաղատանաց՝ զորս մատուցի ամենագթա-  
ծի և ողորմածի Աստուծոյն իմոյ՝ վասն իմոյ մեղու-  
ցելոյ անձինս , և վասն խղճալոյ ազգիս իմոյ . այժմ  
մեծակական ողբով և լալագին աչօք առ ձեզ դի-  
մեմ , և զղբունս սիրոյ և գթութեան ձերոյ բաղ-  
խեմ . ով երջանիկ սուրբքդ Աստուծոյ՝ և յատուկ  
բարեկամքդ մեր : Ով սիրելիքդ Քրիստոսի՝ և  
ծշմարիտ բարեբարքդ մեր : Ով հաճոյական ծա-  
ռայքդ Աստուծոյ , և սրտացաւ տեարքդ մեր : Ով  
համարձակ և հաւատարիմ խորհրդակիցքդ Քրիս-  
տոսի , և բազմերախտ հարք մեր և գթառատ  
ծնօղք : Ով ընտանիք , նախածանօթք , դաստիա-  
րակը և լուսաւորիչք ազգիս մերոյ :

Առ ձեզ է հառաջանքս ով սրբազան Առա-  
քեալք Քրիստոսի՝ սուրբք Շարդուղիմեոս և Թա-  
գէոս . սուրբ Գրիգորիոս Լուսաւորիչ , սուրբք և  
սրբածինք Արդիք , Թարունք և Շառաւիղք Արք-  
քոյ Լուսաւորչին մերոյ . Արիստակէս . Վրդանէս .

Յուսիկ. Պրիգորիս և Դանիէլ։ Առւրբդ Ներսէս.  
Իսահակ. Մեսրոպ և Յակոբ Հայրապետք։ Մը  
և անարատ հարսունք Քրիստոսի՝ Հոփիսիմեանք  
և Գայիսանեանք։ Մը Թագաւորք մեր Վրդա-  
րիս և Տրդատիս։ Մը Ուկեանք, Առւքիասեանք  
և Վարդանեանք։ Ուր յերկրէս և յազգէս մեր-  
մէ, և որբ յերկրոջս մերում կատարեցաք։

Քանզի՝ դուք որսէս զմովսէս և դյեսու՝ աղա-  
տեցիք զմեզ յանմարմին փարաւոնէ և յեգիստա-  
կան գործոց նորին։

Դուք բերիք առ մեզ՝ ի վերուստ զպատգամն  
Վստուածոյին կտորկարանացն։

Դուք լուսաւորեցիք զմեզ հաւատով և Վս-  
տուածպաշտութեամբ։

Դուք զմեզ արարիք աստուածածանօթո. և բա-  
ցիք զբերանս մեր կարդալ առ Վստուած։

Դուք վասն մերոյ ազգիս փրկութեանն կըեցիք  
զայնքան սարսուելի չարչարանսն. և հեղիք զպա-  
տաւական և զսուրք արիւնս ձեր. և ընծայեցաք  
արժանի պատարագ Վստուծոյ. և հաշտեցուցիք  
զնա ընդ մեզ։

Դուք ներկեցիք վարդագոյն արեամբ ձերով ըզ-  
հողս և զքարինս երկրիս մերոյ՝ և ետուք զնոսա  
մեզ՝ ի բժշկութիւն հոդոց և մարմնոց մերոց։

Յերկրոջս մերում կան ամփոփեալք սը՝ հրա-  
շագործ, և կենդանի նշխարք և մարմինք ձեր։  
Յորոց վերայ և յանուն ձեր կանգնեցան հրաշա-  
լի և աստուածազարդ տաճարք և եկեղեցիք։ Յո-  
րոց ելանէին և ելանեն ազգի ազգի շնորհը և զօ-

ըութիւնք։ Յորս հաւատով դիմեալքն առնուին և առնուն զպէսպէս բժշկութիս և պարզես հոգւոց և մարմնոց։ Զորս իրուու յատուկ պարծանք, և տեղի ապահնութե ետ Աստուած ազգիս հայոց։

Արդ՝ ով բազմերախոս հարք մեր և լուսաւորիչք հոգւոց և մարմնոց մերոց։ Զարթիք, և տեսէք զխղճութիւն վանորէից և եկեղեցեացն՝ որք յանուն ձեր են կառուցեալք, հայեցարուք՝ ի տառապանս նոցա՝ զորս կրեն՝ ի պէսպէս թշնամեաց։ Յորոց և բազումք ըստ մեծի մասին կան ամայիք և անշքացեալք։ Յորս եղեալ բազմահրաշ դամբարանք ձեր՝ անսպատուեցեալք և անարգեցեալք։ և ազգ մեր, անտիրացեալ և անօդնական յուստեք, մատնեալ՝ ի ձեռս տերանց խստարտաց։

Արդ՝ առ ով դիմեսցուք. ում սրատմեսցուք զվեշտս և զտառապանս մեր, և կամ զնվ արկցուք միջնորդ և բարեխօս առ Աստուած վասն մեր՝ եթէ ոչ զյառուկ բարեկամոդ և զծանօթսդ մեր. զհաճոյական ծառայսդ և զսիրելիսդ Աստուածոյ։

Քանզի՝ մինչ բարկանայր Աստուած հնոյ ժողովը ըրդեանն, նոքա զԱրրահամ. զՄովսէս, զԴաւիթ, և զայլս նախնիս իւրեանց՝ յիշէին և միջնորդ արկանէին առ Աստուած. որպէս յայտ է ի յերիս մանկունսն, և յայլս բազումս։ Եւ Աստուած ևս՝ վասն սիրոյ և միջնորդութեան նախնեացն նոցին, դառնայր ՚ի բարկութենէն և ներէր ժողովրդեանն։ Որպէս և դաւիթ վկայէ թէ՝ ասաց Աստուած սատակել զնոսա, եթէ ոչ մովսէս ընտ-

բեալն կայր առաջի նորա։ Օք դարձաւ առ տէր՝  
և անցոյց զբարկութիւն նորա։ ասելով՝ եթէ թո-  
ղուս զմելս ժողովրդեան քոյ՝ թող, ապա թէ ոչ,  
և զիս ջնջեա ՚ի դարութէդ։ Եւ ինքն Աստուած  
ևս՝ ասէ բազմից առ ժողովուրդոն թէ վասն ար-  
րահամու սիրելոյն իմոյ։ և վասն մովսէսի և դա-  
ւիթ ծառայիցն իմոց՝ ողորմեցայց ձեզ։

Արդ՝ ով սուրբք Աստուածոյ, ազգիս մերոյ և  
դուք էք աբրահամ, մովսէս՝ և դաւիթ։ զի զձեզ  
կացոյց Աստուած՝ իշխան, առաջնորդ, վերակա-  
ցու և հովիւ՝ այսմ փոքու հօտի։ Վասն որոյ՝  
դուք պարտիք հոգալ զմէնջ. միջնորդել՝ և աղօ-  
թել վասն մեր առ Աստուած։ որպէս նոքա առ-  
նէին վասն իւրեանց ժողովրդեանն։

Քանզի՝ ՚ի կեանս այս՝ որք այնքան տքնեցայք  
վասն մեր, ովլ երանելիք. քարոզելով. պահելով.  
աղօթելով. զակապէս նեղութիս և զանազան չար-  
չարանս կըելով մինչ զի՝ և զարիւնս ձեր հեղիք  
վասն մեր։ Այժմ՝ որք զերծեալք ՚ի տառապա-  
նաց աշխարհիս, կայք փառաւորեալք ՚ի յերկինս։  
և ունիք համարձակութիւն առ Աստուած։ ևս ա-  
ռաւել պարտիք հոգալ զմէնջ և օդնել. և միջ-  
նորդ և բարեխօս լինիլ առ Աստուած և շարժել  
զնա ՚ի սէր և ՚ի քաղցրութիւն առ մեզ։

Ուրեմն՝ սրկանեմ առաթուր ոտից ձերոց ըզ-  
թաղձեալ անձն իմ. անարժան բերանովս համբու-  
րեմ զսուրբ և զշնորհատու նշխարս ձեր. լիզեմ  
զհող հրաշագործ և խնդրականար դամբարանաց  
ձերոց. և արտասուաթոր աչօք հայցեմ ՚ի ձէն զ,

ով սիրելիք Քրիստոսի, յատուկ ծանօթք և բարեկամք մեր: Ով բազմերախտ հարք մեր և գթաշատ ծնօղք. աղաչեմ զձեզ. հայեցարուք՝ ի խըղծութիւնս և ՚ի տառապանս մեր. և վանորէից և եկեղեցեաց մերոց. ողորմեցարուք և օգնեցէք մեզ:

Եթէ ՚ի մեզ ոչ խնայէք վասն մեղաց մերոց. գոնէ՝ ՚ի սպատուական նշխարս և ՚ի սուրբ դամբարանս ձեր խնայեցէք, որք կոխատին և ծաղին ՚ի թշնամեաց և յանարբոց:

Եթէ վասն մերոց անօրէնութեանց՝ բարձի թողի էք արարեալ զմեզ, գոնէ՝ զկմկճալի և զսարսուելի չարչարանսդ ձեր, զորս վասն մեր կրեցիք. և զպատուական արիւնս ձեր, զորս վասն մեր հեղիք մտածեցէք, յիշեցէք, և ողորմեցարուք մեզ:

Յիշեա և դու մանաւանդ՝ ով յատկապէս հայր մեր բազմերախտ, ծնօղ մեր գթառատ, և լուսաւորիչդ հոգւոց և մարմնոց մերոց սուրբդ Քրիդորիս: Օքո երկամեւայ անտանելի և անօրինակ չարչարանսդ. զերեքտասանամեւայ անմբերելի տառապանսդ՝ որ ՚ի վերապին ՚ի մշջ թունաւորացն. զանհանգիսա տքնութիւնսդ՝ և զանդաղար հսկմունսդ ՚ի կեանս քոյ վասն մերոյ փրկութեան:

Առ ընդ քեզ և զսրբազան Առաքեալսն և Լուսաւորիչսն մեր, յորոց և դու շառաւիղեցար: Օսուրբ և զմաքուր Օրիորդսն Քրիստոսի, որ ընդ քեզ հանդիսակիցք և պսակակից եղեն, մեզ աւետառուք և լուսաբերք: Օսուրբ և զքարեբողը Որդիս և զթուունս քո, որք ՚ի յասառուածատունկ որթոյդ ընձիւղեալք՝ մշակեցին զսյգիս

քո բանաւոր . և ոռոգեցին կենդանարար ջրով  
հոգւոյն սրբոյ : **Օ**սուրբ Թագաւորսն և զսուրբ  
Զօրավարսն մեր՝ որք քեզ հետևելով՝ վասն՝ ի  
քէն քարոզեցեալ հաւատոյն սպառազինեցան ընդ-  
դէմ հոգևոր և մարմնաւոր թշնամեաց , և վասն  
քոյոյ ժողովրդեանդ հանդիսացան և նահատակեցան :

**Ո**րք ամենեքեանքդ միաբանեալք՝ մատերուք առ  
Աստուած . մշտանուէր և անդառնալի աղօթիւք  
ձերովք միջնորդ և բարեխօս լերուք առ նա . և  
խնդրեցէք , զի ողորմեսցի մեզ և այց արասցէ .  
վերանորոգեսցէ զհնութիւն ազգիս և եկեղեցեաց  
մերոց . ժողովեսցէ զցան և զցիր եղեալ հօտս իւր  
՚ի գոգ խնամոց իւրոց , և ՚ի ծոց սրբոց եկեղեցեաց  
մերոց : **Խ**նքն հովուեսցէ և պահպանեսցէ զմեզ  
յամենից հոգեկան և մարմնական թշնամեաց . և  
վերակացու լիցի իւրով ամենազօր զօրութեամբն :  
**Ե**ւ մանաւանդ՝ ինձ յատուկ ծառայիս ձերոյ (այս ա-  
նուն) օգնական լերուք , և փրկեցէք յամենից փոր-  
ձութեց , և մանաւանդ՝ ՚ի ներկայականացո : **Ե**ւ  
խնդրեցէք յԱստուծոյ , զի թողութիւն շնորհեսցէ  
բազմատեսակ մեղաց իմոց . և պահեսցէ զիս ըստ  
հաճոյից կամաց իւրոց՝ որբան եմ ՚ի մարմնի : **Խ**ւ  
յետ աստեացս , իւրոյ օրհնեալ տեսութեանն ար-  
ժանացուսցէ ձերով միջնորդութեամբն : **Օ**փ և  
ես ընդ ձեզ փառաւորեցից զհայր և զորդի և ըզ-  
սուրբ հոգին՝ յաւիտեանս յաւիտենից . ամէն :

ԱՀԿՈՒՔ առ ամենայն սուբիւն ԱՀԿՈՒԾԱՅ :

ՈՎ ամենայն Սուրբք Աստուծոյ, հաջոյական  
ծառայք և հարազատ կամարարք նորին: Անարատ  
տաճարք, մաքուր բնակարանք՝ և ամենազուարձ  
հանգիստք ամենասրբոյ Խըրորդութեն: Դի մարմ  
նի անմարմնացեալք, և 'ի յերկրի հրեշտակա-  
ցեալք: Օնեալք 'ի տոհմէս աղամայ, 'ի յերկինս  
կենցաղավարեալք՝ և ընդ հրեշտակսն դասակ-  
ցեալք: Դի յերկրի հալածեալք՝ նեղեալք և չար-  
չարեալք՝ և 'ի յերկինս փառաւորեալք՝ պսակեալք՝  
և ընդ Քրիստոսի թագաւորեալք: Պարծանք հա-  
ւատացելոց՝ և ուրախութիւնք հրեշտակաց: Առու-  
սաւորիչք աշխարհի՝ և զարդք վերին դաւառի:  
Ասլաւէնք և օգնականք երկրաւորացս, զինուորա-  
կիցք և պարակիցք երկնային զօրացն: Յոյս և  
ակնկալութիւնք մեղաւորաց՝ և համարձակ բա-  
րեխօսք առ Աստուած: Աք Յօհաննէս մկրտիչ.  
սռւրբ Ստեփաննոս նախավիրյ. սուրբ Առաքեալք  
և Արգարէք. սուրբ Հայրապետք և Վարդա-  
պետք. սուրբ Արտիրոսք և Շգնաւորք. սուրբ  
Կուսանք և Միանձունք, և ամենայն Սուրբք  
հինք և նորք. որ յայտնիք և որք անյայտք:

Աղաչեմ զնեզ. վասն սիրոյն Քրիստոսի զոր  
ունիք առ նա. վասն սիրոյ և ազգակցութեան ձե-  
րոյ զոր ունիք առ մեզ. վասն սոսկալի չարչարա-  
նաց ձերոց զորս կրեցիք. և վասն պատուական ա-  
րեան ձերոյ զոր հեղիք վասն անուանն Քրիստոսի՝  
և վասն մերոյ փրկութեան. վասն երախտեաց և

բարերարութեանց ձերոց զորս ունեցայք և ունիք  
առ մեզ. ողորմեցարուք տառասլեալ ծառայիս ձե-  
րոց. և հասէք յօդնութիւ տկարութեանս իմում:

Քանզի՝ դուք զփորձն առեալ էք, և գիտէք իսկ.  
զի բնութիւն մեր սխալական է և դիւրասահ.   
մարմին մեր դիւրասլատրելի է և մեղսասէր և ան-  
յադ ցանկացօղ յամենայն վեսասակարս հոգւոյ: Ա, շ-  
խարհս է յամենայնի որոգայթաւոր՝ լի սոսկաե-  
սիլ և թունաւորեալ փաղաքշանօք. ունօղ բազ-  
մատեսակ պատրանաց և խաբէութեանց՝ և տուն  
ամենակերպ փորձութեանց. և թշնամին միշտ առ  
ընթեր՝ դրդող և յորդորող:

Ա, ըդ՝ ո՛լ երանեալք և փառաւորեալք. դուք  
զայս ամենայն տեսիք և զփորձն առիք. բայց շնոր-  
հօքն Ա, սառուծոյ զօրացեալք՝ առ ոտն հարիք զա-  
մենեսեան, և յաղթեցիք քաջութեամբ. և փշրելով  
զորոգայթս սոցին՝ ապրեցայք և թռեայք յերկինս՝  
և առիք զհանգիստն յաւխենից: Ուրեմն՝ ոքք  
զփորձն առիք, կարօղ էք և մեզ փորձանաւորացս  
օգնական լինիլ:

Վ ասն որոյ՝ աղաչեմ զձեզ ո՛լ Սուբբքդ Ա-  
տուծոյ՝ օգնեցէք ինձ փորձանաւոր և մեղաւոր ծա-  
ռայիս ձերոց. փրկեցէք զիս յամենայն որոգայթից  
և ՚ի փորձութեանց. ՚ի հոգեսոր և ՚ի մարմնաւոր  
թշնամեաց. և սկահեցէք զիս յամենից մեղսասիթ  
պատահմանց և ՚ի բնաւից հոգեվնաս ընթացից:  
Աւ բարեխօսեցէք առ Ա, սառուած՝ զի ներեսցէ ա-  
մենից սխալանաց իմոց. և թողցէ զամենայն մեղս  
իմ. և պահեսցէ զիս ըստ հաճոյից կամաց իւրոց,

որքան ՚ի մարմնի եմ։ Եւ յետ աստի կենացս,  
արժանացուցէ իւրոյ քաղցը և օրհնեալ տեսու-  
թեանն։ Օք ընդ ձեզ և ես փառաւորեցից ըգ-  
չացը և զԱրդի և զսուրբ չոգին յաւիտեանս յա՛։

---

**Աշումք առ Երէնացին Չ բնաւորութէնան։**

Արդ՝ առ ձեզ է աղաչանքս, ով երկնայինք և  
անմարմինք, հրեղէնք և հոգեղէնք, արփիափոյլք  
և լուսաւեսիլք. միաք մաքուրք և անարատք.  
սուրբք՝ սրբաբանօղք Աստուծոյ, և անդադար փա-  
ռաբանիչք ամենասրբոյ Երրորդութեանն։ Որք  
կայք միշտ առաջի Աթոռոյ փառաց նորա. և սպա-  
սաւորք էք անվրիպելի հրամանի նորին։ Որք էք  
վերակացուք և պահապանք աշխարհի, և անդա-  
դար միջնորդք և բարեխօսք վասն մարդկան։ Որք  
և ունիք ՚ի յԱստուծոյ կարգեալ ձեզ զյատուկ  
պաղատանս առ նա վասն մեղաւորաց ասելով թէ՝  
ողորմեա դու ստեղծեր, մի կորուսաներ. և զգոր-  
ծըս ձեռաց քոց մի անտես առներ։

Արդ՝ ով երջանիկք և փառաւորեալք, Աթոռք  
Քերօրէք, Աերօրէք, Տէրութիւնք, Օօրութիք,  
Իշխանութիւնք, Պետութիւնք, Հրեշտակապետք  
և Հրեշտակիք։ Եւ յատուկ պահապան և վերա-  
կացու Հրեշտակ իմց անարժան ծառայիս։

Այսմ զձեզ աղաչեմ խոնարհեալ անձամք և  
պատկառեալ դիմօք՝ Վերակացու և պահապան  
լերուք մեղաւոր ծառայիս. և օգնեցէք ինձ յամե-  
նայն ժամու։

Փրկեցէք զիս 'ի հոգեւոր և 'ի մարմնաւոր թըշ-  
նամեաց , և յամենից վտանկից և 'ի փորձութեց :  
Եւ մանաւանդ՝ 'ի ներկայական փորձութեանցս .  
(Էլլէ ռւնիս):

Օ աղօթս և զպաղատանս մեղաւորիս մատուցէք  
առ Աստուած , որպէս է սովորութիւն ձեր . և բա-  
րեխօսեցէք վասն իմ առ նա , ասելով՝ ողորմեա ,  
դու ստեղծեր մի կորուսաներ : Որպէս զի՞ ձերովք  
խնդրուածովք ներեսցէ սխալանաց իմոց . ջնջեսցէ  
զձեռագիր յանցանաց իմոց . և դրեսցէ զիս 'ի դըպ-  
րութիւն կենաց : Եւ յետ աստեացս , ձերով մի ջ-  
նորդութեամբն կացուսցէ զիս յաջակողման դա-  
սուն . և կոչեսցէ յիւր յաւիտենական յարքայու-  
թիւնն : Օ՞ի ընդ ձեզ փառաւորեցից զայր և  
զՈրդի և զսուրբ Հոգին . յաւիտեանս յաւիտ :

### Աղջուկ առ առ-դիլ Խաչն Փահէչական :

Վեծաւ երկիւղիւ , սոսկացեալ անձամբ և ջըշ-  
մարիտ հաւատով . այժմ խոնարհեալ , երկիրպա-  
գանեմ սրբոյ և ամենազօրի Խաչիդ , և անպար-  
տելի Սշանիդ Քրիստոսի Աստուծոյ մերոյ . և 'ի  
քէն հայցեմ զօգնութիւն տառապելոյ ծառացիս  
քոյ՝ որ ես ամենայն բարութեանց ունօղ . ամե-  
նաբաւական , և յամենայնի կարօղ :

Քանզի դու՝ ով երկրպագելի և ամենասուրբ  
Խաչ : Աթոռ ես այնմ ամենահարուստ և ամենո-  
ղորմ թագաւորին , որ 'ի յերկինս յաթոռս լու-  
սեղէնս բազմեալ՝ թէսլէտ միշտ բաշխէր և բաշ-

իւշ՝ առատապէս ամենայն արարածոց իւրոց զքարիս՝ և լցուցանէ զամենեսեան ըստ իւրաքանչիւր պիտոյից. սակայն՝ յորժամ՝ ի քեզ բազմեցաւ յաւուր փեսայութեան, և յաւուր ուրախութեան սրտի իւրոյ, այնքան հաճեցաւ և հաւանեցաւ ՚ի քեզ և զուարձացաւ, մինչ զի ասաց թէ՝ այս է հանգիստ իմ. յաւիտեանս յաւիտենից ՚ի սմա բնակեցաց. զի հաճեցայ ընդ սա :

Եւ յառաւել յուրախութենէն, ո՞չ շատացաւ այնոքիւք հասարակական բարեօքն զորս միշտ հեղոյր յարարածս իւր. այլ բացեալ զդրունս աստուածային դանձարանի մարմնոյ իւրոյ, այսինքն՝ ձեռացն, ոտիցն և կողիցն, բղխեցոյց յիւրաքանչիւրց ականցն զառատահոս աղբիւրս ամենատեսակ բարեաց և շնորհաց. և տարածեալ զամենառատ ձեռս իւր՝ էջեղ և բաշխեաց անչափապէս առ ամենեսեան։ Այնչ զի և զկենդանարար մարմին և զարիւն իւր ո՞չ խնայելով՝ ետ յուտել և յըմպել։ Զայնելով առ ամենեսեան թէ՝ եկայք կերպոյք ՚ի հացէ իմմէ և արբէք զդինի իմ, զորս տամ անխընայօրէն՝ որքան բազմեալ եմ յաթոռս յայս ողորմութեան և ուրախութեան։

Արդ՝ ով տեղի հանգստեան և սիրելի աթոռ ողորմութեանն Աստուծոյ։ Եւ ես մի եմ՝ ՚ի հաւատացելոց և յերկրպագուացն քոյ՝ և ՚ի քեզ բազմեալ թագաւորին. որ եմ աղքատ, քաղցեալ, ծարաւի և կարօտ յամենայնի։ Վասն որոյ՝ աղաչեմ զքեզ՝ զի ինձ ողորմեացիս. և յայդքան անպատմելի բարեացդ՝ (որով լիացան երկնաւորք և

երկրաւորք). մասն մի՛ և յիս ողորմելոյս կարկառեսցես, որ բաւական է՝ ի լցուցումն ամենայնի պիտոյից հոգւոյ և մարմնոյ իմոյ:

Դու ես անօթ, տուփի և բժշկարան այնմ բժշկապետին. որ իւրով աստուածահրաշ զօրութեամբն բժշկեաց և առողջացոյց զբոլոր բնութիւնս մեր՝ ի մահաբեր հիւանդութեանց և 'ի զանազան ցաւոց, զորս ընկալեալ էաք 'ի թունից անմարմին օձին. և շնորհեաց զյաւիտենականն կենդանութիւն:

Այս ամենայն հոգեկեցոյցը և ամենազօրեղք գեղորայքն 'ի քեզ են ամփոփեալք և 'ի քեզ են դանձեցեալք:

Ահա՝ և ես որ մի եմ 'ի ծառայից և 'ի բժշկեցելոցն 'ի քէն՝ և 'ի քեզ բազմեալ բժշկապետէն. վերստին վիրաւորեալ եմ 'ի նոյն հնոյ թշնամւոյն, և ախտացեալ եմ 'ի պէսպէս ցաւս և 'ի հիւանդութիւնս 'ի զանազան թունից նոյնոյ չարին. և կարօտիմ քումդ շնորհաց:

Վասն որոյ՝ աղաչեմ զքեզ ուլ ամենաբաւական բժիշկ. զի զշեթ մի յաղքան ամենատեսսակ բժշկարար շնորհացդ, ցողեացես 'ի յիս. որ բաւական է ինձ 'ի բժշկութիւն հոգւոյ և մարմնոյ իմոյ, և տալ ինձ զյաւիտենականն կենդանութիւն:

Դու ես դաւազան յաղթութեան և զէն անպարտելի՝ ամենազօր փրկչին մերոյ Յիսուսի Քրիստոսի: Որ քև պատառեաց զծով մեղաց աշխարհիս. կործանեաց զփարաւօնացեալ թշնամին յանդունդս դժոխոց. ազատեաց զպատկերն իւր 'ի չար ծառայութենէ նորին. և էհան 'ի վերինն երուսաղէմ:

Քե ջախջախեաց զդլուխ աներեսոյթ վիշապին և  
անմարմին գողիափայ, և ազատեաց զժողովութդն  
իւր 'ի խրոխտանաց և 'ի բռնութենէ նորա :

Արդ՝ և ես, որ մի եմ 'ի ծառայից և 'ի փրկե-  
լոցն ամենազօր փրկչին իմոյ 'ի ձեռն քոյ, վերըս-  
տին գերեաց նոյն թշնամին իւրով ամենաչար հնա-  
րիւքն . և արար ծառայ՝ իւրական չար գործոցն : Եւ  
միշտ խրոխտալով 'ի վերայ իմ, կամի զիս յաւիտե-  
նականապէս ծառայեցուցանել և դժոխային առնել :

Վասն որոյ՝ աղաչեմ զքեզ, ով ամենազօր սբ  
խաչ : Խորտակեա զբոնութիւն թշնամոյն իմոյ .  
և ազատեա զիս 'ի ծառայութենէ նորին : Եւ պա-  
հելով զիս ընդ հովանեաւ քով, հանցես զիս 'ի  
յերկինս ընդ ամենայն փրկեցելոցն՝ 'ի յաւիտենա-  
կան ազատութիւնն և յանտրատում ուրախութին :

Ով ամենացանկալի և յամենեցունց երկրապա-  
գելի սուրբ Խաչ : Միանգամայն դու ես կնիք,  
նշան, և դրոշմ Աստուծոյն աստուծոց, թագաւո-  
րին թագաւորաց, արարչին և նախախնամողին ա-  
մենայն արարածոց : Քանզի՝ քե կնքէ և նշանէ  
Աստուած զիւրսն՝ և բաժանէ յօտարաց : Քե ճա-  
նաչէ զիւրսն՝ և ճանաչի 'ի նոցանէ : Քե գրեաց  
զգիր ազատութեանն ադամայ և նորայնոյն : Քե  
նկարագրեաց զնոր ուխտս և զօրէնս իւր 'ի սիրտս  
նորոյս խրայէլի : Քե արձանագրեաց քակիլ դժո-  
խոցն և ազատիլ հոգւոյն : Քե զատավճռեաց ըզ-  
կործանումն սատանայի և բռնութեան նորա : Քե  
հրամանագրեաց զիսաղաղութիւն երկնաւորաց և  
երկրաւորաց : Քե դրոշմեալ ազատէ և սլահպա-

նէ զիւրսն՝ ի յանկարծամահ սատակմանէ, և յաւիտենական մահուանէ. հանէ յերկինս և գըէ՝ ի դիրն կենաց։ Եւ՝ ի հանդերձեալն՝ զքեզ ունելով առաջի իւր նախնթաց՝ գայ ՚ի դատաստան փառօք հօր՝ ՚ի դատել զամենեսեան։ Եւ քե կնքէ զամենահաստատ և զանսխալելի վճիռն զայն թէ՝ արդարքն երթիցեն՝ ի կեանսն յաւիտենականս և մեղաւորքն՝ ՚ի տանջանսն յաւիտենականս։

Արդ՝ ով ամենաբարելի սեղան, և աթոռ ողորմութեան։ Ով ամենատեսակ շնորհաց օթարան, և ամենայն ցաւոց բժշկարան։ Ով ահարկու ղէն, և ամենազօր դաւազան։ Ով ամենապաշտելի նշան, և անլուծանելի կնիք ամենաթագաւորին Այ և փրկչին մերոյ Յիսուսի Քրիստոսի սբ Խաչ։

Այս ամենայն՝ և ևս առաւել քան զայսոսիկ՝ բիւրապատիկ պարգև և բարութիւնք. բժշկութիւնք և կենագործութիւնք. ազատութիւնք և փրկագործութիւնք. աստուածական տնօրէնութիք և ներգործութիւնք. քե՛ և ՚ի ձեռն քոյ բաշխեցան և բաշխին. գործեցան՝ և գործին. կատարեցան և կատարին։ Որոց գործիքն՝ միջնորդն և շտեմարանն՝ դու ես ով ամենասիրելի Խաչ Քրիստոսի Աստուծոյ մերոյ։

Արդ՝ և ես ամենաթշուառս և ամենողորմելիս. որ մի եմ՝ ՚ի քե փրկեցելոցն և բարերարեցելոցն. քե կնքեցելոց և երկրպագուաց ծառայիցն քոց։ Քանզի՝ քե վերածնեալ կենդանացայ և նորոգեցայ՝ ՚ի հնութենէ մեղաց և ՚ի մեռելութէ մահաբեր ծառոյն։

Քե կնքեցայ և նշանեցայ՝ լինիլ Քրիստոսի և  
ժառանգորդ յատիտենական կենաց :

Քե դրոշմեցեալ բաժանեցայ յօտարաց՝ և դրե-  
ցայ ոչխար և հաւատացեալ Քրիստոսի ճշմարիտ  
հովուին :

Քե կնքեմ և նշանեմ զդէմս իմ և ամրափա-  
կեմ միշտ զամենայն զգացարանս հոգւոյ և մարմնոյ  
իմոյ . և Քե սպարծիմ հանապաղ , և զքեզ ունիմ  
ինձ յոյս և օգնական յամենայնում ժամու :

Եւ այժմ՝ անկանիմ առաջի ամենազօրի սրբոյ  
նշանիդ . և խոնարհեալ երկիրապագանեմ . և համ-  
բուրեմ շրթամբք հոգւոյս զհող պատուանդանիդ .  
և խնդրեմ աղաչանօք . զի զքո սուրբ և զահեղ  
անունդ և զսոսկալի կնիքդ անջնջելի և անմենկելի  
պահեսցես 'ի հոգւոյ և 'ի մարմնոյ ծառայիս քոյ .  
և ընդ հովանեաւ քով պահպանեսցես զիս 'ի հո-  
գեոր և 'ի մարմնաւոր վտանգից :

Երկիրապեմ ընդ քեզ և սրբոց և հրաշագործ  
գործակցացն քոց . աստուածակիր և կողամուխ  
սրբոյ Կեղարդեանն . սոսկալեաց սրբոց Ռևեռացն .  
աստուածաշօշափ սրբոյ փշեայ Պատկին . և այլոց  
պատուական արեամբ ներկեալ Նշանաց և Պոր-  
ծեացդ չարչարանացն Քրիստոսի Աստուծոյ մերոյ :

Որք ամենեքեանքդ՝ էք շտեմարանք շնորհաց .  
աղբիւրք բարեաց . գործիք փրկուեն . նշանք ամենա-  
զօրք . և անտկարանալի սուրք ընդդէմ թշնամւոյն:

Որոց ամենեցունցդ խոնարհեալ երկիրապագա-  
նեմ՝ մեծաւ երկիւղիւ և պատկառանօք . և աղաչեմ  
զձեզ . ուշ շնորհատուք և փրկագործք սբ Նշանք :

Ե երուք ծառայիս ձերոյ. միշտ օգնականք պահա-  
պանք՝ հովանիք և վերակացուք. 'ի տուէ և 'ի գի-  
շերի. 'ի ննջել և 'ի յառնել. 'ի նստիլ և 'ի գնալ.  
'ի գործել և 'ի հանգչիլ. և յամենայնում ժամուտ

Որպէս զի՝ ընդ ձերով հովանաւորութիւն ամբա-  
վակեալ և պարսպեալ՝ կեցից պահպանեալ և  
փրկեցեալ յամենից մեղաց. 'ի փորձութեանց դի-  
ւաց. 'ի մարդոց անիրաւաց. 'ի չարախոհ և 'ի  
զրախօս լեզուաց. 'ի մարդադէմ գազանաց. 'ի  
թունաւոր և զւասատու կենդանեաց. 'ի յերեսելի  
և յաներեսոյթ թշնամեաց. 'ի հոգեսոր և 'ի մարմ-  
նաւոր վտանգից. և յամենից պէսալէս յորոգայթից  
և 'ի չարահնար պատահմանց:

Եւ 'ի յիշելն իմ զսոսկալի անունս ձեր, և 'ի  
կնքելն զղէմս իմ, հալածեսցին և չքասցին. կո-  
րցեն և անյայտք եղիցին ամենայն հնարք՝ երե-  
սոյթք. ազդմունք. ծողակը և որոգայթք չարին:

Եւ որչափ՝ և յորժամ յարիցեն 'ի վերաց իմ  
'ի պատրել և 'ի նենդել զիս ըստ հոգւոյս և ըստ  
մարմնոյս, տեսանիցեն պարսպեալ և կնքեալ ամե-  
նասոսկալի անուամբ ձերով՝ դարձցին յետս ամօ-  
թալից և գլխակորք:

Եւ որքան եմ 'ի կեանս յայս, կեցից պահպա-  
նեալ և ապրկեցեալ յամենայն որոգայթից թշնա-  
մեաց՝ և յամենից մեղսառիթ ընթացից՝ սուրբ և  
հրաշալի անուամբ ձերով:

Եւ յետ աստեացս ձեօք կնքեցեալ՝ ներկացա-  
ցայց առաջի Քրիստոսի Աստուծոյն իմայ, և դասե-  
ցայց ընդ աջակողմեանսն, և լուսոյց զօրհնաբանե-

լի ճայնն զայն թէ՝ եկայք օրհնեալք հօր իմոյ . և  
ժառանգեցէք զյաւիտենական կեանսն : Յայնժամ  
և ես փառաւորեցից զՔրիստոս Աստուածն իմ  
ընդ հօր և ընդ սրբոյ հոգւոյն . և զձեզ զսուրբ և  
զփրկագործ նշանսդ՝ գոհութեամբ բարեբանեցից  
յաւիտեանս յաւիտենից . ամէն :


**ՅԵՂԱՊՈՒՀՈՒԹԻՒՆ ԳՐԾԱԿԱՐԻ ԳՐԿԱ ԱՎՈՇԵՒ :**

Անլոելի գոհութիւն Երեքսրբեան Տերութեան  
միասնական սբ Երրորդութեանն հօր և որդւոյ և  
հոգւոյն սրբոյ , որոյ աներեսոյթ աջոյն օժանդակու-  
թեամբ յաջողեցաւ տպագրութիւն հոգեշահ աղօ-  
թիցս 'ի վայելս Աստուածամէր աղօթաւորաց :

Հայցեմ սիրողաբար յամ քրիստոսանուն վա-  
յելողացդ զհոգեկեցոյց Արդասիս Աղօթիցս յի-  
շատակել 'ի խնկելի աղօթս ձեր զբաղմերախտ  
հանգուցեալ Հայրն մեր զտէր Յարութիւն Քահա-  
նայն վարդանեան Առւքիասեանց , և զմայրն մեր  
զՎարթխաթունն և զորդիս սոցա զԱվահակ վարդա-  
պետն և զտիրացու Եփրեմն վաղամեռիկ և զվա-  
զաթառամ թոռունս սոցա և զայլ ամ զհին և  
զնոր ննջեցեալսն . և աղաչել զանոխակալ գթութիւն  
Աշխարհափրկիչ կենարարին խառնել զամենե-  
սեան 'ի լուսազարդ երամս սիրելեաց իւրոց , և յա-  
ւուր համաշխարհական ահեղ հարցափորձի կա-  
մարարացն իւրոց առնել դասակից և սկսակից :

**ՎԵԽՇԱՌԱՆ:**






Գ. Ա. Ա. Ա.

Գիտակ և Կոմլեքս:





3 E P A R B N U P M P I P L T. M J U M M C Q M U U F M M

-8/5-43 P.

